

# OLELO SOOLEMPWA

## IYA SOOMALIHERIWA



Mwiire mweemenleene, xontte, okathi onuuramih'ahu miru sahu wira nivekele.

<sup>2</sup> Tithi Ootthuneya a Wirimu, hiyo nooxukhuru ohiy'ula mwaha wa, oreeriwa nno okina w'orwa ni oruuha Ehapari yooreera ela, yoovuwa ni yooreerexa ya Yesu Kristu. Hiyo ninnooxukhuruni Nyuwo okhala wira Owo nlelo onkhala mmosaru nsana, olelo, ni mahiku othene. Hiyo ninnooxukhuruni Nyuwo mwaha w'atthu ala athukumanne va okathi ula wooriirya, ni nlelo ni nrromelo aya muulupale, elipelelaka, yaaminiki wira etthu yootepa oreera ninoorowa ovahiwa okhuma wa Muluku. Hiyo ninrwa ni nrromelo yoowo, Pwiya, mwa khula muthukumano. Hiyo ninnooxukhuruni Nyuwo mwaha wa miteko, nsuri ohiyu, otapernakulu; ninnooxukhuruni Nyuwo mwaha wa muteko va nsana ohiyu, ni mwaha wa muteko olelo, otapernakulu. Ninniwehererya vanci-ene vano etthu Nyuwo murin'anyu wa hiyo ohiy'ula.

<sup>3</sup> Tithi, hiyo noosuwela wira khula mutthu onwerya ovenxa matata aamuwerya okhunla makukhu a Bibilia, masi ori Mmosa paahi Yoowo onwerya omukhaliha mukumi ni eekeekhai, nto owo ti Nyuwo. Nto, Tithi, hiyo ninwehererya wira Nyuwo munimwiira yeeyo ohiy'ula. Munireerihe mwa khula enamuna. Mirima sahu ti soohakalala vanci-ene woonaka wira okathi ori vakhiviru hiyo onrow'ahu okumana ni Yoowo, niitho nniitho, Ole omuphentaly'ahu ni omukhalenly'ahu iyaakha iya sothene.

<sup>4</sup> Aakhala anci-ene, Pwiya, arukunxale murima a naanaano. Nisuwelaka wira eyaattelo yuulupale, miloko mixexe wala miloko mithanu, anrowa opatisiwa mwa Nsina Nanyu, voosiisu, a muteko wa nsana ohiyu. O Muluku, xontte mutthikele, hiyo ninnivekela, mpakha khula Epyo ya Muluku etthommwale yoone Waarya wa Ehapari yooreera, ni ekele munikotoni.

<sup>5</sup> Hiyo ninoovekelani wira munisuke ohiy'ula ottuli wa Masu; munikhalihe ohoona itthu sa molumwenkuni, ni munitthuniherye omoona Yesu. Okhale musuwelelo wa Omwaako w'Orukunuwa eriyari ahu, ohiy'ula, wira nihimooneke hata mutthu woohikhala Yesu paahi. Hiyo ninvekela mwa Nsina Nawe, ni wa ovuwa Wawe ni olipiheriwa wa Ehapari Awe yooreera. Amen.

Mukilaathiki.

<sup>6</sup> Kinrowa orukunxela miikoro iya, ahiiso meesa ala, epantt'ila nno, yakhala saana, wira kiweryeke woona ipantte soopiili sa

muthukumano. Kinoona wira kinoowerya opweha mikrofooni iya va oratteene. Vaareera, okathi vakhani paahi.

<sup>7</sup> Hiyo ninnikhomasa, okhuma autitooriyu muulupale va ohiy'ula, apatthan'ihu wArizona, California, Texas, ni Estadu Unidu othene, ni enamuna ya telefooni. Ela, ela enrowa elapo yothene, mutek'ola ohiy'ula, ni enamuna ya telefooni, tivo ninniroromela wira Muluku onoonireeriha.

<sup>8</sup> Munniwerya wiiwa, ottuli wa—w'autitooriyu mpakha epantte ya moonoo woolopwana? Vaareera, enrowa owehawehiwa vano esisteema ya telefooni, yooniwe sinto ennivara muteko oratteene.

<sup>9</sup> Athhu othene t'otteeliwa murima ohiy'ula? [Muthukumano oniira, "Amen."—Mol.] Ahe, ti yoooreera! Epantt'ila nno? ["Amen."] Amen. Kootteeliwa murima woona wira nyuwo othene mookilaathi vooreerela.

<sup>10</sup> Nto vano meelo ohiyu, muttitthi wathhikela-ru wuncerereyaka, nave-tho onookhala telefooni oratteene. Ookhala ohiy'ula. Kinoona wira amosa-amosa ari otapernakulu wu.

<sup>11</sup> Nto, meelo voosiisu, miteko khasinrowa okhalaniwa otapernakulu, okhala wira e . . . onookhala-wo mulipa a maluwa weiwo ophwanelihaka ekereja mwaha wa niira n'othelana meelo oxekuwa. Ni soothamiheriwa mi—miteko, voosiisu, okereja wa Munna Ruddell, mmosa w'axirikh'ahu, nto eyo ti—ti rampha muulupale nno, 62. Yoohimmwa? [Munna Neville oniira, "Ayo."—Mol.] Yoohimmwa. Ni, wakhala-ru woosareiwaxa iwe, ninrowa waakuxa ale anihala nimuveleelihe murumeyi mukina wa Munna Junior Jackson, oClarksville wu. Ethhu nitthokihenry'ahu wa Munna Ruddell, okhala vakhiviru va, ni ninoowerya . . . ni nuupuwenle wira munooowerya ophwanya vookhweya. Vano nto ninoorowa okhapelela mwa enamuna emosa. Ni muhialeele okhalana opatiiso uwo wothene meelo, ni kinwehererya wira anookhala akina emiya wala imiya piili anrowa wiitakanxa n'ale a opatiiso meelo. Nto vano meelo ohiyu . . .

<sup>12</sup> Khonkisivela ohimya khalayi ene etthu enrow'aka olaleerya, masi ohiyu umosa vamutekoni, wala nihiku nimosi, kintthuna kilavule mwaha wa: *Tani Melikisetekhi Ula?* Okhala wira, ti mwa—mwaha kinoon'aka wira ninkhala okathi wa soowuupululiwa iya, seiyo sikhanelle sookohiwa moovirani m'okathi, sa, "Mutth'ula aari Pani?" Ni kinnaamini wira Muluku ookhalana waakhula, aari Pani Uwo. Akina yiirale, "namukuttho," akina khwira, "mwene," akina . . . Masi ehaana . . .

<sup>13</sup> Yakhalaru yookohiwa, ohaana okhala waakhuliwa yookoha eyo, ekhanle y'ekeekhai. Khivanweryaneya okhala yookoha ohitonko okhala waakhula.

14 Vano, hiyo ninniroromela wira Muluku onoonivaha eparakha ohiy'ula ya Masu Awe, okathi onsom'ahu Yaawo.

15 Ni nyuwo munnikhalana... Billy ookileela wira kooleleni vekeekhai munnikhalanaka wiiwanana oratteene n'atthu va onikhaliherya enamuna y'opweha ikaaro, ni mapiliisa ni sothene. Mutthikele siiso; ti yooreera, yooreera saana.

16 Ninniroromela woona okathi, khino vahilokenle, okathi khino onwery'ahu oruaha eheema wenno opooma nipwehe nno okampu wa mphira, weiwo naakhanly'ahu okhalaka okathi wowaattexa, khino isumana tthaaru wala xexe, muhakalaliho, vohihiyerereya. Nto ti voorika osuwelana mmosa ni mukhw'awe, vano naanaanoru nihaana wira kwaherini n'urowa-tho. Masi kaatthuna kirwe wira kikhale mukwaha woolekela, emaara emosa onrow'ahu okhala ni wookhikhalo oomaliha ohiyu umosa wala miili, masi okhala paahi ni wiixuttiha, othana n'uhiyu, othana n'uhiyu, nirowaka siiso. Khino mutthu orowa owaani ni waalyiha alyakhu, owama eleethi imompe, n'utthika esumana ekina n'utthikela muteko w'okokhorela. Miyo—miyo okisivela yeeyo. Tivo Apwiya ekhale ni nyuwo.

17 Vano, kihinatthi okhuma, khino Ttiminku voosiisu wala Ttiminku ohiyu, wala nihiku nikina, muteko mmosa, koosuwela wira nyuwo othene munliplelela wiiwa Mutthaka mwa Ekeekhai ya *Othelana Ni Omwalana*, yoowo okhanle mmosa wa milattu suulupalexsa sa nihiku nla. Ni kookupali saana ntoko seemenly'aka va, kookupali wira waakhula woolikana ori mwa Masu a Muluku, ni kookupali wira mwaha wa yeeyo kilaihaly'aka otthika.

18 Ni kinoona wira, voosuwela, mpakha sinsuwel'aka, kintthuna kikhale muteko w'okokhorela mukina wenno oJeffersonville, Ettiminku ya Pasikha, ni nino... muteko w'okokhorela wa ophattuwa wa nsuwa, nto nuumala Ettiminku ya Pasikha. Vano hiyo ninoohimya voowaakuva ni niphavele khino omoola autitooriyu, vaweryaneya vale, wala nipuro nimosa, wa Ttiminku, khino ninoorwa Saapatu ni Ttiminku. Kihaana orwa mmutteekeni n'utthika naanaanoru, okhala wira ohaattamela okathi... Kihaana oweha saana, toko, ni mutthokiheryo orin'aka, ni emosa wa yawaka—yawaka—muttala aka oCalifornia. Nto nuumala, naanaanoru nuumala yeeyo, kihaana orowa wa—wAfrika. Tivo mukhale oowiriyana ni munivekelele.

19 Vano, ohiy'ula, kintthuna koowiriyaniheni nipuro nimosa na Masu a Muluku, nimphwanyaneya kapiitulu 4 ya Luka Oowaarya. Kapiitulu 4 eversiikulu 16, enoopacerya, Yesu alavulaka.

... *Olelo Masu ala aamaliheriwa owaruni wanyu.*

20 Vano nintthuna nikumihe, Vaavo, emaliheryo ya moota Masu a Muluku akhanly'aya a ikuru! Vano, hiyo othene ninoowerya osuwela saana maakina, masi sintthuneya Ikuru wira sivarihe muteko Yaawo.

21 Ninoowerya osuwela saana mekaanika ya maakina, ekaaro, masi nto sintthuneya ikuru wira iroota sivare muteko ni weetta.

22 Vano, Yesu aarootthikela o—oNasareti, weiwo aaleliwaawe-wo. Ohoolo wa Soolempwa va, ninniphwanya wira awo yiirale, “Hiyo nihiiwa wira Nyuwo muhiira etthu *khata khata* oKafarnawu. Vano munihye niwooneni mwiiraka nno elapo Anyu Yeenyu.”

23 Yesu khwira, “Pro—profeta khonikhala oohittittimihiwa voohikhala wira elapo awe.” Nto, vekeekhai, ti weiwo onleliwaanyu-wo, ni weiwo atthu anoosuwel'ayani. Nto weiwo Owo aarina n—n—nsina noonanara, opacerya wene, mwaha wa Owo oyariwa ohikhalanne tiithi a elapo ya vathi. Awo yaamwiihana “mwaana ooraruiwa,” wira Maria vekeekhai aahirupala ahinatthi otheliwa, mwa ikano, ni Yosefe. Masi, kahi siiso, hiyo noosuwela wira khayaari siiso.

24 Ni mwa Yoolempwa ela, etthu ekikhalinhe maitho aka owehexexa yeela, yaari etthu ekhumelenle naanaano oPhoenix, Arizona. Naari nihiku nookiserya, na muteko kaarowaaka olaleerya Vamuthukumanoni wa Mulaponi wothene w'Alipa a Nakoso a Ehapari yooreera Yoomalela.

25 Nto vamuthukumanoni vaava aahikhala muletto ni hiyo, aari pixipu muKatolika, yoowo okhanle—okhanle a “Mavekelo a oKhalteya a ekereja Katolika y'Arummwa; Reverendu Muulupale John S. Stanley, O.S.D.” Owo ti “pixipu muulupale a muttette wa Estadu Unidu,” mukereja Katolika. *Ela* yaari ettikitti awe ni—ni epantte awe.

26 Nto owo aari muletto n'Alipa a Nakoso aKristu, ni miyo kaahimoona weiwo, nsana naya. Nto okathi waalavul'aka Saapatu ohiyu, kookupali wira yaari yeeyo, ahiiso Saapatu voosiisu wolyani wa voosiisu, nto miyo... Kilavulaka, owo aakhala akiwehaka miyo. Miyo khuupuwela, “Mulopwan'ole vekeekhai khonikupali sothene kinihimy'aka.” Nto, moosuwela, mwaamuwerya—mwaamuwerya omoona; owo aakhala attikinyaka muru, masi vekeekhai nkaasuwela exeeni yaamuhaaxa.

27 Vano Ttiminku oxekuwa, okathi ovenny'aka wira kilavule, kaarowa okuxa yoosoma aka ya mwaha *Owereya wa Oyara*, vaavo Yesu ohimaly'awe, wira, “Ntoko muthiyana aayaraka,” onnoona owereya aayaraka. Nto siiso kaarowa olavula okhuma vaavo, ntoko, *Owereya wa Oyara*, mwaha ene, kihimyaka wira olumwenku ori moowereyani wa oyara vano. Mutokweene ohaana okumihiwa, wira musya ayariwe; ntoko e—epyo ehaana wuntta, wira ekumiherye ekumi esya.

28 Ni moota owereya, owereya wa oyara othukumelinh'aya olumwenku! Mwa Ekhotto Yoopacerya ya Mulaponi mothene, owo waahoono owereya wootepa, okhala wira ekaaxi ya veneno, ni sikina, yaahalela onyaanya olumwenku. Ni mwa Ekhotto ya Neili ya Mulaponi mothene, owo waahikhalana ekina, owereya wootepexa; saahikhalaniwa misikha s'osulu, ni musika wa aatomu. Eyo khenwerya ovilela owereya wa oyara okina. Ni makompora ala ni itthu olelo, ekhotto emosa ekina enookumiha mphironi, maana eyo vano enrowa ovuluxiwa. Nto enrowa okhala elapo esya. Bibilia ohimnye wira enookhala.

29 Vathi va Mutthaka wa khula profeta, Isarayeli aahikhalana owereya wa oyara, okhala wira maprofeta ala yaakhumelela okathi mateyooloku ni anamukuttho yaamal'aya okhalana ekereja mwa mukhalelo mmosa wa mutthenkeso. Nto okathi maprofeta awo yaakhumelel'aya ni SIISO ANIHIMYA T'APWIYA, awo yaanittikinya ikereja iye, nto eyo yaanoona owereya wa oyara. Vookiserya, eyo yaahoono owereya wa oyara mpakha omuyara Mwaana a Ehapari yooreera, yoowo aari Masu Mwaneene oowiipaka erutthu.

30 Tivo vekeekhai ekereja eri mwa owereya wa oyara ohiy'ula, emaara ekina, wira oyariwe Mwaana, Mwaana a Muluku onoorwa-tho. Mateyooloku ahu othene, iyeettiheryo sahu sothene, miromolelo sahu sothene, sooninttela vathi vahu. Vano hiyo ninoona owereya wa oyara, ni Mutthaka onkhuma wa Muluku kweekwe onnikhaliha ekereja moowereyani mootepa, masi nuuvira okathi vakhani enrowa omuyara Mwaakameliwa. Enrowa omuruuha Yesu Kristu wa Mwaakameliwa Awe.

31 Vano, nto, kuupuwelaka wira mulopwan'ola khaareere ohikikupali. Okathi waavennyaka wira kilaleerye Mutthak'ola, miyo kaahimukhunla Bibilia aka, wira kiphwanye nipuro nene.

32 Ni amwaar'aka yaammalaru okivaha Bibilia musya, mwaha wa Natale. Bibilia aka a khalayi aarina iyaakha soophiyaka muloko ni thanu, nto aahalela okhereya kapatti-kapatti. Makukhu, khula okathi waamukhunl'aka, yaanivava-mo. Nto, masi kaanisuwela vatthu xeeni w'ophwanyanya khula Yoolempwa, tivo nkaareere osoma mBibiliani mme. Nto miyo khumukuxa ole musya, okhala wira ole mukina aakhala ntoko oohooneya saana, orowa-no okereja.

33 Nto vapacenry'aka okhunla mwa Yohani Oowaarya, vaavo Yoolempwa yaaphwanyiw'aya-vo, kipacerya osoma kapiitulu 16, ni eversiikulu kaaphavel'aka khayaari vaavo. Vano kuupuwela, "Yootikiniha!" Miyo khukhunla-tho; nlelo khayaari vaavo.

34 Nto Munna Jack Moore, a oShreveport, Louisiana, mpatthani aka a vatthirima, owo aakilanthe vaavo. Miyo khwira, "Munna Jack, yeeyo khemphwanyaneyya mwa Yohani Oowaarya 16?"

Owo khwira, "Ayo."

<sup>35</sup> Nto namukutth'ola muKatolika khuyenya vaakilanth'awe, eriyari y'anamukuttho oophiyaka emiya yaakilanth'e vaplataforma; khweetta mpakha vaary'aka, ni ikuwo sawe sothene ni malay'awe ni miikimanyo, ni sikina, khweemela vakhiviru ni miyo. Nto owo khwira, "Mwan'aka, mukhale oolipa. Muluku ohanle wira etthu."

Miyo khuupuwela, "Pixipu muKatolika onikileela yeeyo?"

Owo khwira, "Musome muLiivuruni mwaka."

<sup>36</sup> Vano miyo khusoma Yoolempwa muLiivuruni mw'awe, khukuxa mwah'aka khukelela ohoolo, khulaleerya mutthaka aka.

<sup>37</sup> Nuumala, okathi kimalihaly'aka, owo khuyenya miyo kironweene, khwira, "Yookhala etthu enrowa okhumelela. Nuumala yeeyo, ekereja ehaana okhuma mw'evitikavitika ery'aya-mo, ahiiso hiyo nihaana okhuma mw'evitikavitika ekereja ery'aya-mo." Tivo, emosa wala ekina.

<sup>38</sup> Nto miyo kiira kirowaka owaani, kitthikelaka oTucson, ohiyu yoole. Anamwane yaanlela yolya, vano miyo khweemela wira kithume yolya nipuro naamukhaani naatumihiwa yolya. Nto amwaar'aka khwira, "Bill, nkinakhaleke oowuukhuwa kookhalaru, owoonani mmwaapapelaka Bibilia owo." Khwira, "Khayookhalihani oonanariwa?"

<sup>39</sup> Miyo khwira, "Nnari." Miyo khwira, "Kaahisuwela wira yaari memmo nipuro nlo. Awo khayaahenle-mo nikukhu nene. Oroovonyeya wootthitiwani."

<sup>40</sup> Nto awo khwira, "Wuupuwela, wira miyo kihoovahani Bibilia owo! Yaakhala ntoko khula niitho mme naakiweha miyo."

<sup>41</sup> Nto miyo khwira, "Ahe, khimwaakhanle ohuluwa yeeyo. Waari otthitiwa ovonyeie mBibiliani." Miyo khwira, "Awo khahenle-mo nikukhu nene."

<sup>42</sup> Ahe, miyo khukelela owehaweha-tho, oolikana ntoko saaweryaney'aya okhala; masi vammalel'aya kapiitulu 16, nipuro, nipuro nlo nri ntoko isentiimeturu thanu na piili okhuma vathi, ekapiitulu 17 epantte ekina, enoolikana saana. Nto, mwaha w'okhala Bibilia musya, makukhu awo maili yaaroo-pharaana oratteene, nto miyo kaasoma kapiitulu 17 ohiya 16. "Ahe," miyo khwira, "ti vooreera. Mwaha wa niwoko nimos."

<sup>43</sup> Nto voowiiweya ntoko mwaakhanly'anyu wiiwaka khula nsu, Nsu nimos khukirweela, khwira, "Owo aahikela oNasareti, weiwo aaleliwaawe; khuvolowa mpaani moothukuamana, ntoko saary'aya elimalelo Awe. Vano namukuttho aahimunnya Soolempwa wira asome, vano Owo aahimusoma Yesaya 61. Vano vamanly'awe osoma Soolempwa, Owo aahikilaathi; khimunnyererya Bibilia murumeyi, Eliivuru, khukilaathi. Nto

maitho othene vamuthukumanoni yaamuwehexaxa Yoowo. Nto Moolumo ooreerexa yaakhuma mwaano mw'Awe. Nto Owo khwira, 'Olelo Soolempwa iya soomaliheriwa.'

"Olelo Soolempwa iya soomaliheriwa."

44 Moota Soolempwa sikhany'aya soolikana! Nyuwo mwaweha vale ela mwa Yesaya 61:1 mpakha 2, ti vaavo Pwiy'ahu aasomaawe-vo, Yesaya 61:1 mpakha 2. Masi eriyari ya versiikulu 2 ya Yesaya 61, Owo khuhiyererya. Vaavo ehimaly'aya wira, "Eroho y'Apwiya eri mwa Miyo; wira kilaleerye eyaakha yoothuneya," vano Owo khuhiyererya. Mwaha wa xeeni? Nipuro nikina, oruha ehukumu, khayaari ya orwa Wawe woopacerya, masi Orwa Wawe wa neili. Moone, khayaari ya yeeyo iwe. Moota Soolempwa sihinvonyaaya! Ti soolikana okathi wothene. Yesu aahiyyerenrye vaavo Soolempwa saamalenly'aya, 'okhala wira ti yeeyo yaari wira elipiheriwe nihiku Nawe, vano, orwa iwe woopacerya. Orwa wa neili Owo onrowa oruha ehukumu mulaponi; masi kahi okathi ule. Owo aari wira "alaleerye eyaakha yoothuneya."

45 Nkanweheni Mesiya eemenleene vaplataforma, wira aisooniherye Mmansawe ni Masu oolaiheriwa a okathi ule. Yootikiniha, Mesiya weemela ohoolo w'atthu okereja! Nto nkawehani Masu ala ooreerexa va, okathi Owo onihim'y'awe va, "Wira kilaleerye eyaakha yoothuneya."

46 "Eyaakha yoothuneya," ntoko hiyo othene ninsuwel'ahu, ntoko anammusoma Bibilia, yaari "eyaakha ya yopeeli." Wira, okathi ipottha sothene n'alipa-ootthukeliwa, ntoko saary'aya, oovariwa, otthukeliwa; ni yaahaana omuvaha mwaana mulopwana, wira elive eteeni; wala mwaana muthiyana, wira elive eteeni, [Nipuro vahiitthu mufiitani—Mol.] nto awo yaari mw'epothani. Khivaacali okathi xeeni awo yaakhanly'aya mw'epothani, wala okathi xeeni waatthuneya awo okhala memmo; yaphiyaru eyaakha ene, ya yopeeli, nuuruma nlope, khula mutthu aahaana otaphuwa atthuna vale otaphuwa. [Nipuro vahiitthu mufiitani.] Mootaphuwa. Khamwaakhala-tho epottha.

47 Masi mwatthuna vale okhala epottha, vano mwaahaana okuxiwa khuroihiwa mpaani mookokhorela, khweemela vanripuni na mpaani mookokhorela, nto waakuxiwa muttemulelo khuttemuliwa mwiithe vanaaruni vanyu, vano nto mwaahaana omurumeela pwiya owo a epottha mahiku anyu othene.

48 Nlikanyiho xeeni nooreerela nikhanly'aya na Ehapari yooreera ya Yesu Kristu! Okathi Eyo enlaleiwaaya, okathi wootthuneya, ni okathi wa Yopeeli; khula mutthu, hata wira mw'ani, nikhuli xeeni mury'anyu, muromolelo xeeni muniiraanyu mpantta, okathi xeeni mukhanly'anyu oohuruwela mutampini, wala exeeni ehilonke ni nyuwo; munooowerya

otaphuwa mwaiwaru nlope na Ehapari yooreera oruma. Mootaphuwa!

<sup>49</sup> Masi mwarukunuwela ettuli Mutthaka khukhootta wiiwa Yoowo, nwehe, mwaamuttemuliwa owaruni, ni muttemulelo. Eyo enihimya wira, ohimya wira, mootupha mukaano eriyari ya mahala ni olamuliwa, ni khamunrowa-tho wiiwa Ehapari yooreera. Khamunrowa-tho orowa ottaiwene. Muhaana okhala epottha a eyeettiheryo mury'anyu-mo, mahiku anyu othene, mwakhoottaru wiiwa eyaakha yootthuneya.

<sup>50</sup> Vano, epantte ekina ya yeeyo, ntoko sihimaly'aka, khivaatthuneya waakhuliwa, okhala wira Mesiya ola onrwa, okathi ula vano, p'ukathi Owo onrowaawe oruua ehukhumu.

<sup>51</sup> Vano, moota xeeni athu yaakhanly'aya ovonyaka woona Ele Owo aary'awe? Yaavirale sayi vasulu? Yaakhala sayi, yahaareere okhala yoosuwelihiwa voowooneya ni wooniheriwa? Vaaweryaneya sayi awo ohoona? Okathi Owo . . .

<sup>52</sup> Nuulumo xeeni! Muupuwele, "Olelo Soolempwa iya soomaliheriwa vamaithoni vanyu." T'ani ohimye? Muluku Mwaneene, Yoowo okhanle mutaphuleli a Masu Awe Mwaneene. "Olelo Soolempwa iya soomaliheriwa." Mesiya, Mwaneene, eemenleene ohoolo wa muthukumano ni osoma Masu a Bibilia, yaamuhimya yoowo Mwaneene, vano nto wira, "Olelo Soolempwa iya soomaliheriwa," nto awo nlelo khuvonya woona Yeeyo.

<sup>53</sup> Maxakha xeeni awo yaarowaaya okhala, masi ehiiraneya. Ehiiraneya imaara sinci-ene. Yaaweryaneiye sayi wiiraneya? Vekeekhai, ntoko siiraly'aya imaara sikina, mwaha wo waamini etaphuleliwo ya Masu ni mutthu. Ti yeeyo yaairihale. Alipa-oowaamini ale mahiku ale, oowiihaniwa alipa-oowaamini, yaakuxa otaphuleliwa w'etthu namukuttho aahimaly'awe wa Soolempwa. Tivo Yesu, ahiiraka mpantta wa hata mmosa wa mixovo sayi s'atthu, Owo aahoomoliwa munikhuruni mwaya.

<sup>54</sup> Nto, tivo, awo khayaawerya omweemererya Owo ni yaawo, okhala wira Owo aari oovirikana n'awo. oMutthu wa Yesu Kristu waari mmosaru paahi vahaatthuney'aya okhala mutthu aakhanle ovonyaka woona wira ole aari Mwaana a Muluku, okhala wira Owo aari wiisuwanyeiha woolikana wa Soolempwa saalempwe mwaha wa Yoowo.

<sup>55</sup> Ti siiso onsuweliwaaya khula muKristu, okathi makhalelo awe ansuwanyei'aya itthu sene seiyo sintthuneya muKristu wira.

<sup>56</sup> Moota Owo aawery'awe weemela vale ni wira, "Olelo Soolempwa iya soomaliheriwa vamaithoni vanyu!" Moota ery'aya yoorika, moota ery'aya yoowooneya, nnakhala vo athu ale khayiiwale oratteene. Mwaha wa xeeni? Okhala wira awo yaakuxale otaphulela wa enamuna emosa y'anamukuttho awo yiiwelel'aya.



57 Nto echantisi kweekwe ennithikela. Vano Soolempwa sookhalana yoohimya yinci-ene Memmo, wuupululiwa wunci-ene.

58 Mwa nlikanyiho, ntoko enihimy'aya mBibiliani, wira, "wEjitu koomwiihana mwan'aka," emuhimyaka Yesu. Musome mukerekhere yeeyo, nto munoophwanya wira, yaamuhimya-tho Yakope, Yoolempwa emosaru. Yesu aari Mwan'Awe muulupale. Yakope aari mwan'Awe Owo aamwiihann'awe wEjitu, yeeyo enniphiiha ehimyo ya Scofield ni ihmilyo sikina, okhala wira eyo ti yaari Yoolempwa yaahimmwa. Tivo yaarina iya—iyaakhulelo piili; yaahikhalana eyaakhulelo ya wiihaniwa wa Yakope, ni wiihaniwa wa Yesu.

59 Nto siiso t'ery'aya olelo! Okhala wira hiyo nri mw'evitikavitika mury'ahu-mo, ni atthu anoovonya wona Ekeekhai ya Muluku, okhala wira khasireere itaphuleliwo sa Masu a Muluku soopakiwa ni mutthu. Muluku khammutthuna hata mutthu wira ataphulele Masu Awe. Owo ti mutaphuleli Awe Mwanene.

60 Muluku iirale, woopaceryani, "Okhale okokola," vano okokola waahikhala. Eyo khentthuneya hata otaphuleliwa.

61 Owo iirale, "Mwali harusi onoorupala," vano owo aahirupala. Eyo khentthuneya hata otaphuleliwa.

62 Okathi. . . Otaphuleliwa wa Muluku wa Masu Awe okathi Owo onlipihery'awe ni wooniherya wira Awo ti siiso. Iwo p'utaphulela Wawe, ophiiherya okhumelela. Ti vaavo vari otaphulela wa Muluku, okathi Owo oniirih'awe Masu Awe okhumelela. Owo onootaphulelani Yaawo.

63 Ntoko wira wahaatonko okhala okokola, nto Owo khwira, "Okhale okokola," vano khukhala, eyo khentthuneya hata nutthu wira ataphulele.

64 Masi hiyo nintakanxa iyeettiheryo soopakiwa ni mutthu Memmo, nto, mwairaka, mu—munookumiha mphironi. Kweekwe enkhalasiiso.

65 Masi nlelo kinuupuwela moota yaakhanly'aya yoothamaleya. Muupuwele yeeyo, Mesiya! Mwaha wa xeeni awo yaavonyaly'aya omoona Yoowo? Okhala wira, ahooleli aya yaatthuneya wira emusuwele, yaatthuneya okhala oosuwela saana Soolempwa, yaatthuneya okhala oowiiwaka oratteene Soolempwa, awo yaahimutakhaliha Mulopwan'ola khwira, "Owo mwaana ooraruwiwa, o—opacerya wene. Hiyo khanikhanle omwaamini Owo."

66 Soovira iyaakha, hiyo khaninaamini yeeyo. Hiyo naamukhwela ehaakhi y'ohimya wira Owo aari Mwaana aayariwe ni harusi.

67 Nto enimwiiraneya nihiku nimosa wira, itthu sene seiyo sinimoon'ahu Yehova airaka olelo, atthu mwa okathi

onoorwa, wakhala-ru vale, animookhwa mwaha wa itthu sinihimy'ahu olelo. Muhaana wira ekanyeryo ya nxeni yarwa vale, nto muhitthuneriwaka olaleya Ehapari yooreera siisa. Okathi wiiraana wuulupale wa ikereja onrowaaya okhala vamosa, yoowo okhanle woolikana naanaano va wa ekereja ya molumwenkuni, munrowa okhala oolipiherya onamoona anyu ni ekumi anyu, wa Yeela.

<sup>68</sup> Muhaana waamini Yeeyo naanaano va. Vaakhanle wira anamukuttho ale yaaniwerya ohihimuwa, yaumulamunle omuhukhumu Yoowo, khayaarowa omuhukhumu. "Masi," nyuwo muniira, "kaakhanle-ru weiwe, kaamwiira *elexe ni elexe*." Ahe, ole khawaari okathi anyu. Masi, ola okathi anyu, ola p'ukathi anyu.

Nyuwo muniira, "Ahe, Owo aakhanle-ru vaava!"

<sup>69</sup> Bibilia ohimnye wira, "Owo mmosaru nsana, olelo, ni mahiku othene," mmosaru, tivo Owo ori vaava. Masi, Owo ori vaava. Okathi olumwenku onisilimu aya, onakhala muulupalexa, ni woosomaxa; Owo ori vaava mwa mukhalelo wa Eroho, yeeyo awo ahinwery'aya wiiva wala okeliha mookhwaani. Owo okhwiye emaara emosa; Owo khokhanle okhwaakatho. Owo aahaana wiipaka erutthu wira Muluku akelihiwe mookhwaani v'erutthuni, mwaha w'etampi. Masi okathi ula Owo khaakhanle okhwaaka; Eyo Eroho Yowarya.

<sup>70</sup> Vano, wuupuwela paahi wira awo yaahikhalana itthu iyo sa nthowa ni Yoowo! Ethhu ekina, wira Owo khaatthunne wiitakanxa ni hata muxovo aya mmosa. Vano, moone, eyo nlelo yaanimukhaliha Owo ntoko mutthu oohiloka. Owo khaarowa wiitakanxa ni mi—mitthenkeso saya, khaatthunne wiitakanxa ni onamukuttho aya, ni Owo khaatthuna okhala nnaata ni seiyo. Vano nto, ohiya sothene iyo, Owo aahiphavela opwanyulasa ethhu awo yaatenk'aya.

<sup>71</sup> Owo aahikela mpaani mootthukumana. Hiyo ninimwiihana Mutthu oomaala; Owo aari yoowo, masi imaara sinci-ene khaninsuwela saana ele ekhanle omaala.

<sup>72</sup> Owo aari Mutthu oomoriwa ikharari, masi nlelo hiyo ninoovonya imaara sikina osuwela omoriwa ikharari exeenii. Kahi ovara murima wa mutthu, kuhiyo omoriwa ikharari. Masi *omoriwa ikharari* "wira otthuna wa Muluku."

<sup>73</sup> Owo aahivira vantthiyani w'o—w'oPetesta, vamukhora. Vale yaanimmaathi atthu, mittitthi sene. Mittitthi kanihiyo nummaru noophwanela. Masi saanimmathi mittitthi; oosupiwa oohoona, ootuthunya, oorakala. Nto Owo aanaamorela ikharari atthu, okathi wothene. Vano Owo aahimuwela mutthu mmosa ahaari oosupiwa, oohoona, ootuthunya, nnakhala oorakala; khino owo aarina eretta ya mmavoro, khino owo aarina eretta ekhaani yoopisa. Owo aarina iyaakha miloko miraru ni tthaaru. Khiyaarowa omuhaaxa, khiyaarowa omwiiva. Owo

aammaathale voolilini. Nto Owo khwira, “Munnitthuna okhala mukumi?”

<sup>74</sup> Vano mulopwan’owo khwira, “Nkirina mutthu wira akikelihe mmaasini, masi okathi onrwaaka, ahe, mutthu onoovira ohoolo waka.” Moone, owo aaniwerya weetta, aaniwerya woona, aaniwerya wetteetta, masi aari ootteettheya.

<sup>75</sup> Nto Yesu khumwiirela wira, “Nvenye. mukuxe olili anyu muroweke owaani.” Vano Yesu aahikohiwa mwaha wa yeeyo, maana nyuwo munnuupuwela wira Yooempwa yoohimya yeela.

<sup>76</sup> Khivanxankiha! Vaakhanle wira Owo aamoowa oJeffersonville ohiy’ula khupaka etthu siiso, nlelo aamulavuliwa.

<sup>77</sup> Masi, muupuwele, Owo aarwiiye wira etthu emosa, waari otthuna wa Muluku. Vano, eyo eniphwanyanya mwa Yohani Oowaarya 5:19, munoophwanya waakhula. Owo iirale, “Vekeekhai, vekeekhai, kinoohimeeryani wira, Mwaana kharwerya wira etthu Meekh’awe; masi ele oniwoon’awe Atithi yiiraka, Mwaana onniira.”

<sup>78</sup> Vano, awo yaahaana osuwela wira iwo waari olipiheriwa y’ohimya y’eprofeta ya Moise, “Okhala wira Apwiya Muluku anyu anoomuthanla Profeta oolikana ni miyo.”

<sup>79</sup> Mooweha, wira okathi Owo omoonaly’awe mulopwan’ole, Owo iirale. . . Yesu aahisuwela wira ole aari mwa mukhalelo yoola iyaakha sinci-ene. Moone, ory’ene Profeta, Owo aahimoona mulopwan’ole mwa mukhalelo yoole; nto khurowa vale khutthukula—khutthukula ephiro Awe eriyari y’atthu ale, aviraka muhina mwa muttitthi, mpakha Owo omuphwanya mulopwana mmosa.

<sup>80</sup> Khwaavira oosupiwa, ootuthunya, oohoona, ni oorakala, nlelo Mutthu oomoriwa ikharari vanci-ene. Masi, *omoriwa ikharari* onkhala “wira otthuna wa Muluku.”

<sup>81</sup> Vano, hiyo ninnimuphwanya wira Owo, khaaitakanxa n’awo, Owo khaatthuna okhalana nnaata ni makhuru aya, vano Owo aanikhoottiwa. Owo khaakhalana hata. . .

<sup>82</sup> Ohiya vo, Owo aahirowa mpaani mookokhorela nihiku nimosa. Mutthu aarookela mme khuphwanya empa ya Muluku ery’ene ntoko yoohononiwa ntoko siry’aya olelo. Awo yaamuthuma, otumiha, waakakhanya musurukhu. Vano Owo khupittula meesa a musurukhu; khukuxa mikhoyi khusipheela, khwaamana alipa-oowakakhanya musurukhu mpaani mookokhorela. Ni khwaaweha n’uviruwa, nto khwira, “Yooempwa,” aleluya, “Empa y’Atithi Aka empa ya mavekelo; vano nyuwo mookhaliha nikhuku n’anawiiye. Nto nyuwo, n’ilimalalo sanyu, moohonona sooruma sa Muluku.”

<sup>83</sup> Oh, nikhuru ntoko nle naamukhalakhala nimwaaminiki? Nnari, mulopwana. Awo yaahiiwolowa mmaroveni mw’atthu

ni makhurumela a nihiku, mpakha yaakhanly'aya ooriiryaxa v'enamukuttho mpakha yahaawery'aya wona ettikinyeyelo ya Owerya wa Muluku Oowerya sothene. Khivanxankiha mwaamuthiyana aawenry'awe okwannya nlaya Nawe khuvonihiwa ni Yeeyo; nto nakhotto namuhapaliwa aahiwerya osenyela wiitho Wawe khuhoona hata ekuru! Entthuneya moota munaattamel'anyu Yeeyo. Entthuneya moota muniwehaanyu. Mwaarowaka okereja, entthuneya etthu mumphavel'anyu.

<sup>84</sup> Vano ninnimoona Owo eemenleene vale. Vekeekhai yaahilopolana, yaahilopola... namukuttho aahaalopola atthu, "Vano Owo onrwa wenna Esaapatu enoorwa, nto, Owo arwa vale, muhimwiiwelele. Vano, nyuwo pooti orowa mukilaathi va, masi muhiwelele etthu Owo onihimy'awe, okhala wira Owo khoniira mpantha wa nikhuru nahu. Owo t'okhoottiwa. Owo khorina ettikitti y'opatthana. Owo khorina hata mutthenke-... ewarakha ya mutthenkeso. Owo khorina hat'etthu siiso."

"Xeeni Uwo?"

<sup>85</sup> "Mmiravo mmosa oohaamini oyariwe ohitto nno, oyariwa woohifayi, owannyawe kalapinteero, ame awe yaamurupanle Owo awo ahinatthi othelanasana, vano amphavela ovitha etthu ene yeeyo ni etthu ya ovikana soopattuxiwa.

<sup>86</sup> "Hiyo noosuwela wira, Mesiya arwa vale, Owo onrowa okhuruwa aviraka munvireloni sa Wirimu arowe wa mukhulupale ahu aanamukuttho iire, 'Miyo kiri va, Kaifa.'" Masi hiyo ninnoona wira Owo khairale siiso, okhala wira khiyaalempwe siiso muhina mwa Masu. Eyo yaari elimalelo yoopakiwa ni mutthu yawaaminin'he yeeyo.

<sup>87</sup> Masu yaahihimya wira Owo aarowa orwa siiso ntoko saarwiiy'awe. Nto owo aaphwanyaneya vale, asomaka Masu, ni aahimeeryaka wira, "Olelo Soolempwa iya soomaliheriwa vamaithoni vanyu." Nto nlelo awo yaahivonya omoona ahiiso omusuwela Owo, ntoko yiiraly'aya okathi wothene.

<sup>88</sup> Nowe khino aahaahimeerya etthu emosaru, nihiku aakenly'awe mukalawani nto mukhora khuwaleya. Moise khino aahivenxa ecanela ele osulu w'ekalawa, khuweha muthukumano... Muupuwele, Muluku t'awanle mukhora. Nto khino siiso owo aahimya wira, "Olelo Soolempwa iya soomaliheriwa vamaithoni vanyu," masi waahaaxela yaawo okathi uwo. Owo aahilaleerya iyaakha emiya ni miloko miili, wira aphavele waakeliha mukalawani mme owo aatenk'awe, aahimeeryaka wira Yoolempwa yaahimye wira, "SIISO ANIHIMYA T'APWIYA, enoorupa epula," masi awo khayaareere olipelela. Masi Nowe aaniwerya ohimya vookhweya-vo wira, "Olelo, nihiku nenla, Soolempwa iya soomaliheriwa."

<sup>89</sup> Moise, nihiku nenlo Nlumi na Mooro naakhurunwaaya oMwaako Sinai khimukhalela onamoona, Moise khino aahihimya wira, "Olelo Soolempwa iya soomaliheriwa."

<sup>90</sup> Moise, moosuwela, aari mutthu iihaniwe ni Muluku, profeta. Nto okathi iihaniwaawe, ary'ene profeta, owo aahaana okhalana musuwelelo wa soovikana soopattuxiwa. Wira akhale profeta, owo aahaana okumana ni Muluku niitho nniitho khulavula ni Yoowo. Nto etthu ekina, etthu aahimy'awe yaahaana wiiraneya, weso khaavo aarowa omwaamini.

<sup>91</sup> Tivo khaavo mutthu orina ehaakhi yo wiisiihana siiso mpakha alavule niitho nniitho ni Muluku, ottuli mothakoni nipuro nlo, weiwo okumann'awe ni Muluku, mmansawe. Ni othene oohimutthuna Muluku mulaponi khayaawerya omukumiha eyo ni otaphulela waya; owo aari weiwo, owo aanisuwela wira yaahiiraneya. Khula muKristu aahaana okhalana musuwelelo yoowo ehinatthi ohimya etthu y'okhala muKristu. Musuwelelo anyu yeenyu!

<sup>92</sup> Miyo kaalavula ni musulu aka, okathi vakhani ovinre, mmiravo mmosa muKatolika, iirale, "Taata Bill, koorowa nno ni nno, kirowaka mapuro othene, kiphavelaka ophwanya etthu." Ohiyu p'uhiyu, muthukuman'ola ohinatthi opacerya, owo aarookhala anlaka. Nto ohiyu, aaniloha akelaka, atthimakelaka waltaari, weiwo onlaleiwa-wo, ni olapa wira owo oovonya.

<sup>93</sup> Miyo khwira, "Melvin, hata wira muneererya orowa woowi, ikereja kavi muniitakanxaanyu, 'aMutteliwe Maria,' akavi munaahimy'anyu, wala iparakha kavi sa mutthu, muhaana oyariwa vasya ni Eroho ya Muluku. Eyo ti etthu emosa paahi enrowa osiveliha murima wa mutthu."

<sup>94</sup> Vano, koosuwela wira aakhalana erantteliho, olelo, ya oyariwa vasya, ovahana matata paahi ni mulaleyi n'uhela nsina nanyu muliivuruni. Masi, apatthani, nlo nikano. Eyo kehiyo Ekeekhai ya Bibilia. Yaakhanle, Miteko s'Arummwa, kapiitulu 2, yaarowa osommwa so, "Vaaphiyaly'aya Nihiku na Pentekosite, pastore aahikhuma khuvahana matata n'atthu."

<sup>95</sup> Masi ehimnye wira, "Vaaphiyaly'aya Nihiku na Pentekosite," woopaceriwani wa Ekereja, "waahiiwanyeya okhuma Wirimu oruma ntoko epheyo enoopa n'ikuru, yaasanrye mpa mothene mwaary'aya." Ti siiso Eroho Yowarya yaaruuly'aya emaara yoopacerya. Ti siiso Eyo enrwaaya khula okathi okhuma okathi yoole. Owo Mulukuu, khanrukunuwa. Vano, Eyo ennaakwattula atthu.

Awo aniira, "Eyo yaari ya mahiku makina."

<sup>96</sup> Ahe, Owo mmosaru nsana, olelo, ni mahiku othene. Khula okathi Ekereja etonko aya waakhela Eroho Yowarya, Eyo kweekwe jaarwiiye ntoko Eyo yiiraly'aya emaara yoopacerya, ni elepelo emosaru, Miteko 2:38; khenavirikaneke, khenkhalakhala evirikanaka.

<sup>97</sup> Ntoko elepelo murette ya meetiku w'eretta. Owo onoolepela murette eretta, meetiku onniira. Nto mwamuroihelaru mulipa a nfaramaasiya oohisuwela, vano owo khuhela murette

wowaattexa, onookhala woovolola khonrowa wooreerelani; owo ahelaru eveneno yinci-enexa memmo, onoowiivani. Ehaana olemmpwa ntoko meetiku.

<sup>98</sup> Nto elepelo murette ya meetiku wa moota wo waakhela Eroho Yowarya yoovahiwa ni Tothoro Simoni Petru, Nihiku na Pentekosite. “Kinimoovahani elepelo murette. Murukunxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi, nto munimwaakhela yoovaha ya Eroho Yowarya. Okhala wira elepeliwo murette ti y’ale ari ottaiwene, othene Apwiya Muluku ahu antthun’aya owiihana.” Elepelo murette Yoohimala!

<sup>99</sup> Moise aahikhhalana musuwelelo yoola. Owo aahirowa mpakha elapo awe khupacerya waaleela atthu, “Kookumanana Nlumi na Mooro. Naari vamwiiwani waavarela. Nto Owo ookileela wira kooleleni, ‘MIYO T’ULE KINKHALA. Rowakani; Miyo kinookhala ni nyuwo. Mmukuxe ttootto mmatatani mwanu munvarelele wEjitu; sothene munrowaanyu ovekel, enimwiireya.”

Ahe, alakela namukuttho mmosa iirale, “Ethiru!”

<sup>100</sup> Masi awo voonaly’aya sookhumelela s’ekeekhai ya yeela, okuxa, wiiraneya, awo khayaawerya-tho ovilela. Awo yaahisuwela wira owo aarummwe ni Muluku.

<sup>101</sup> Vano, vakhala wira Moise aahihimya wira aahoona yeeyo, ni aahikhalela onamoona wira yaari Ekeekhai, nto Muluku aahaana, vakhala wira eyo Ekeekhai, wira asuwanyeihe ni alipiherye moolumo a mulopwan’owo, Ekeekhai. Eyo ekeekhaii.

<sup>102</sup> Vakhala wira Yesu Kristu aaheemela vale khusoma, nihiku nle, “Olelo Masu ala aamaliheriwa ohoolo wanyu,” Muluku aahaana wiiriha Masu ale wiiraneya.

<sup>103</sup> Hiyo nineemela va ohiy’ula ni wira, wira, “Yesu Kristu mmosaru nsana, olelo, ni mahiku othene.” Muluku ohaana wooniherya wira ti siiso, okhala wira Awo Masu Awe. Vano, entthuneya exeeni? Ontthuneya waamini, wira mwaamini Yaawo. Ontthuneya waamini, waamini Masu Awe, wira Awo Ekeekhaii.

<sup>104</sup> Nkawehani etthu yaakhumelenle okathi Moise aakumihaly’awe aana, ni othene ale yaamutthanre. Ale yahaamutthanre yaahanle wEjitu. Masi ale yaamutthanre Moise, okathi alapunwaaya Ephareya Yooxeerya khuphiya mothakoni, Muluku aahikhuruwa vaMwaako Sinai. Nlumi nle na Mooro naahikhaliha mwaako wothene ovarela mooro, nto Nsu nimosa khulavula vaavo, vano Muluku khuvahererya sooruma muloko.

<sup>105</sup> Moise siiso aaronwe vale mpakha ohoolo w’atthu, khwira, “Olelo Soolempwa iya koohimenry’akani ntoko profeta Awe, siniiraneya olelo. Kaahooleelani wira Muluku aahikumana ni miyo, osulu iwe vamwiiwani waavarela, muNlumini na Mooro,

nto Owo khuhimya ela, 'Miyo . . . Ela enrowa okhala ethoonyeryo. Nyuwo munrowa waaruha-tho atthu ale nipuro nenla.' Nto vale ori Muluku, muNlumini nenle na Mooro koohimenry'akani wira Owo aari memmo, niithomeiye iwe vasulu vamwaako. Olelo oprofeta ola woomaliheriwa. Owo ori vaava wira alipiherye wira itthu kimanly'aka ohimya ti Ekeekhaii."

<sup>106</sup> Muluku anivahe-tho atthu siiso, akhanle oororomeleya ni anaxariya, ni anihimya Ekeekhai, wira Muluku Oowerya sothene awerye olipiherya wira Masu Awe nlelo Ekeekhaii! Owo onkhala mmosaru nsana, ni mahiku othene. Owo ahaarowa wiirela-ni? Owo aahihimya wira yeeyo.

<sup>107</sup> Yoxuwa siiso aahimyaale siiso, nihiku otthink'awe oKadexi-barne, weiwo awo yaarowaly'aya ottaiwene mothakoni. Awo yaamuhoverya muttetthe owo okhala muthinto wa muttetthe Muluku aahimaly'awe wira waamukhala. Masi Muluku aahaalela wira waari muttetthe wooreera, waanikhwalala eleethi n'uravo. Nto Yoxuwa ni Kalebi yaari aili yaawo paahi yaaminni, w'ale akina muloko yaakhumme. Vatthikans'aya, awo yaahikhalana eyooniheryo; yaahikhalana nivara na iwuuva yaawerya okuxa alopwana aili paahi a ikuru.

<sup>108</sup> Yoxuwa ni Kalebi siiso yeemelanse vale khwira, "Olelo Soolempwa iya soomaliheriwa. Ela ti eyooniheryo wira muttetthe wooreera." Vekeekhai. Mwaha wa xeeni? "Ela ti eyooniheryo wira muttetthe wooreera. Ti yayi naarowaahu ophwanya itthu sene ntoko iye, wEjitu? Khayaakhanle mapuro siiso. Masi olelo Soolempwa iya soomaliheriwa."

<sup>109</sup> Owo siiso aahimyaale etthu, emosaru, okathi aalalenry'awe khwira wira ixiri s'oYeriko saamurowa omora awo n'urukureryasa vaara vathanu na vaili, mahiku mathanu na maili, vaara vathanu na vaili khula nihiku. Nto okathi arukureryans'aya vaara vookiserya, ixiri saahimora. Yoxuwa siiso aavennye khweemela khwira, "Olelo, Mukhulupale Oomalela a anakhotto a Apwiya aakihimenrye isumana sivinre wira yaarowa wiiraneya siisa, olelo Soolempwa iya soomaliheriwa." Vale saaphwanyaneya ixiri, siphomowenleene vathi. "Hayani, nrowe nakuxe. Ti wawihu. Olelo Soolempwa iya soomaliheriwa."

<sup>110</sup> Moota ery'aya yoothamaleya, atthu a Muluku aneemererya itthu siri s'eeekhai!

<sup>111</sup> Isarayeli, omuro, okathi akuxaly'aya muttetthe, khulapuwela epantte ekina. Yaarowa wira sayi? Ola mweeri w'Abriil. Maasi yaamusarya okhala wira nakhutu aamutothowa, oYuteya. Oh, yaakhala ntoko wira Muluku aari mukhulupale oohisuwela, waaruha atthu Awe vaavale, mweeri w'Abriil, okathi Yordani aasanry'awe maasi ovikana okathi mukina. Imaara sikina . . .

112 Khino kaamuwerya weemela vaava, kaakhalanne okathi, wira koovaheni muruku mwaamukhaani paahi. Imaara sikina nyuwo pooti mukilanteene vo ni kankuru, wala pooti mukilanteene ni eretta; munuupuwela, “Vano, miyo, kiry’ene muKristu, kimpwanyaneya siisa? Kinkhalela-ni siisa, kiry’ene muKristu?” Imaara sikina Muluku onnihiyererya itthu okhala sooriipelexa muhinwery’anyu woona osulu, vary’anyu, wala nipuro nikina, vano nto Owo onimoorwa ni wootthukulelani ephiro mwa yeeyo, wira nyuwo mwiire, “Olelo Soolempwa iya sinoomaliheriwa, Owo aahimaly’awe wira.”

113 Owo aahaahiya aana aHeperi weetta erowaka muttukutthani mwa mooro. Awo khwira, “Muluku ahu onniwerya onoopola vamooroni va muttukutthani. Masi, nnakhala vo, khaninrowa wuuramela elatarato anyu.” Okathi akhumans’aya mme, wunkha wa ttukuttha mwa yaawo... kiireke, hata wunkha wa ttukuttha, mwa yaawo; khino siiso yaahimiyale wira, “Olelo Soolempwa iya soomaliheriwa.”

114 Okathi Daniyeli aakhumaly’awe mulittini mw’akharamu, owo siiso aahimiyale etthu emosaru yeeyo.

115 Yohani Mpatisa. Saaviraly’aya iyaakha imiya xexe sa miixuttiho s’enamukuttho, khivanxankiha ekereja yaary’aya mw’evitikavitika okathi ule! Vakhumelenly’awe mothakoni, Yordani, owo khino siiso eemenle vale mukerekhere, ntoko siiraly’awe, khwira, “Olelo Soolempwa iya, Yesaya 40, soomaliheriwa.”

116 Moota kaakhanly’aka weemelaka va ni wooleelani etthu namukuttho ole mutokweene aakihimenry’awe! Khwira, “Mwan’aka, khamunamalihe Mutthak’owo.”

Miyo khwira, “Mukhale oomaala.”

Owo khwira, “Munihimya wira aPentekosite ale khaanoona yeeyo?”

Miyo khwira, “Nnari.”

117 Owo khwira, “Miyo kinnoona.” Nto namukuttho muKatolika, nave! Uh-huh. Owo khwira, “Muhikelenle-ni ohoolo?”

Miyo khwira, “Mukhale oomaala.”

Owo khwira, “Avuwihawe Muluku! Miyo kinnoona.”

118 Nto okathi ene yoole Eroho Yowarya khimukhuruwela murokor’awe, aakilante vamuthukumanoni vaavale. Vano owo khuvenya, alavulaka ilavulelo soohisuweliwa, khutaphulela etthu ene yeeyo namukuttho ni miyo naalavul’ahu, vaplataforma. Ekereja yothene, nipuro nothene, khukela mw’evirikavirika. Vano eyo khutthikela ehimmwaka mpakha omuthukumanoni wa Oral Roberts esumana evinre, ahiiso esumana ehinatthi ele evinre, ni waari ti mwaha wa nvaanelo wa muthukumano. Moota namukutth’ole...Vathi va Eroho



Yowarya, yaamusuwelinhaaya muthiyana, murokor'awe kookupali wira aari yoowo, etthu yaakhumelela vaplataforma vale, khuupulula etthu ile hiyo naipitih'ahu.

119 Okathi onkhal'ahu, olelo Soolempwa iya soomaliheriwa. Olelo Waarya wa makaaripi ohoorwa, nto hiyo ninoovonya woona Yoowo. Nwehe.

120 Yohani iirale, "Olelo miyo ka 'nsu na ole onikhuwela mothakoni,' ntoko sihimaly'awe profeta Yesaya. Mwaalokiherye ephiro Apwiya!"

121 Awo khayiiwale saana. Khwira, "Oh, nyuwo mwa Yesu. . . nyuwo mwa—nyuwo mwa Kristu," kiireke.

122 Owo khwira, "Miyo nkihiyo Kristu." Owo khwira, "Nkimphwanela otaphula ixapattho Sawe. Masi," owo khwira, "Owo omphwanyaneya eriyari anyu, nipuro nlo," maana owo aahikupali wira Owo aamukhala vaavale. Owo aamukhala nihiku nawe, 'okhala wira Muluku aahimuleela wira aarowa omooniherya Mesiya.

123 Nihiku nimoso Mmiravo mmosa khurwa eettaka vale, nto owo aahoonu ntoko Waarya vasulu Vawe, ethoonyeryo. Vano owo khukhuwelela, "Mmoone Mwaapwittipwitthi a Muluku! Olelo Soolempwa iya soomaliheriwa ohoolo wanyu." Vekeekhai.

124 Nihiku na Pentekosite, moota Petru eemenly'awe khuhimya Yoolempwa aya, ya Yoweli 2:38. Okathi, awo yaaris'aya othene atheyaka, atthu ale. Awo khayaaweryasa olavula ilavulelo saya. Awo yaamukukumasa etthu ekina. Bibilia ohimnye wira, "Malumi ookawanyeya." *Ookawanyeya* enihimya nlu mi "noomeyeya", ehihimyaka etthu, ekukumaka paahi. Yiiraka itthu ntoko atthu oohapaliwa!

125 Awo othene khwira, "Ahe, atthu ala aroohapalasiwa. Nkaawehaseni, nkawehani moota siniir'aya, moota athiyan'ale n'alopwana. Ari mw'epurumapuruma," naahimya nikhuru nle n'anatiini a nihiku nle.

126 Petru khuyenya eriyari aya, khwira, "Alopwana n'axinna, nyuwo munkhala oYerusalemu, ni nyuwo munkhala oYuteya, musuwele wira atthu ala khahapaliwe, ntoko sinuupuwel'anyu, maana nlelo iwoora ttharu sa voosiisu. Masi ela t'ile ehimmwe ni profeta Yoweli wira, 'Enimwiiraneya mahiku ookiserya, Miyo kinimwaavaha voomalela Eroho Aka atthu othene.' Olelo Soolempwa iya soomaliheriwa." Vekeekhai.

127 Lutero aari m'okathi. Wesley aari m'okathi. Pentekosite aari m'okathi. Khiivo hat'etthu ehikhanle yoolikana.

128 Vano kinoovekelani nyuwo wira mutthokelele ehuhu ni okathi onkhal'ahu vano, ni Masu yaalaiheriwe olelo. Vakhala wira okathi ovinre, atthu yaaniwerya wira, "olelo Soolempwa iya," "olelo Soolempwa iya," nto ankhi Soolempwa s'olelo? Exeeni yaalaiheriwe olelo? Nimphwanyaneya vayi hiyo? Okathi

xeeni onkhal'ahu; eroroco yeettaka, eroroco ya siyensiya, minuutu miraru wira ophiye ohiyu eriyari? Olumwenku onimuukhuwa. Ekereja eri voolilini va soonanara. Khaavo onsuwela veemenly'awe. Okathi xeeni ula wa nihiku? Ankhi Soolempwa s'olelo? Mikhalelo sa ekereja, ahiiso, mikhalelo sa ekereja olelo!

<sup>129</sup> Molumwenkuni, ipoliitika, iyeettiheryo sa mulaponi mwahu, ti soowuntta ntoko sinweryaneyaaya. Miyo nkhihiyo napoliitika. Miyo ka muKristu. Masi, nkirina naata y'olavula ipoliitika, masi kintthuna paahi kihimye wira sihintta ipantte soopiili.

<sup>130</sup> Miyo kithanlale emaara emosa, waari wa Kristu; kihaana oxintta. Xetwani oothanla akivirikanyaka, vano Kristu ookithanla; entthuneya enamuna xeeni kinimwiiraaka mwaathanle aka. Kinnitteeliwa murima omuvaha Yoowo; olumwenku ohimeye ethu onthun'aya ohimya. Miyo nlelo kinnaamini wira Owo mmosaru nsana, olelo, ni mahiku othene. Owo onimooniherya. Vekeekhai Owo onimooniherya. Vekeekhai.

Wuncerereya wa ikhirime, otakhala murima w'amwaavano!

<sup>131</sup> Nkawehani elapo ahu, yaatonko okhala nluwa na elapo ya vathi. Elamulelo ahu y'athu yuulupale epakiwe wu wo—wo. . . w'olaleeriwani wa otaphuwa. Vano olaleeriwa wa otaphuwa waahikwerethiwa, vano hiyo khukhalana otaphuwa. Nto axitiith'ihu oopacerya, ni itthu siiraly'aya; hiyo naahikhalana elapo yuulupale.

<sup>132</sup> Masi eyo enimuntta vano, ni ophomowa, ni ottikinyeya, ni olakaseya. Ni ophavela waaliviha athu mpoosito, wira ephwanye musurukhu eveleelihe wu, wira ethume opatthani n'awanani aya; awo annirihela wiitho wahu. Ekhotto ya mulaponi mothene, ikhotto piili sa mulaponi mothene, ni nlelo erowaka okela ya neeraru. Vekeekhai. Ipoliitika ti soowuntta, soopahuwa, wuntta mpakha vathi. Vekeekhai ntoko Matewu 24 sihimaly'awe wira yaamukhala, "Elapo enoowana ni elapo ekina, omwene onootuphela omwene mukina." Itthu iya sothene saamurowa okhumelela. Nrowe nitthokelele yeela vano. Vaareera.

<sup>133</sup> Nwehe ekina, wuncerereya wa ophavela wa siyensiya. Vano, okathi mmosa, paahi e. . . Apwaapu aka yaarowaka owoona apiipi aka, mukaaroni ya imompe. Vano nteekee, wala hata okhuma mw'ephiro y'elapo mpakha osulu, ota w'ephaka. Yuulupale aya. . . Moota, t'ani aahimye yeela? Daniyeli 12:4, iirale, "Osuwela onimuncerereya mahiku ookiserya." Hiyo ninnoona okathi onkhal'ahu. Nwehe vano mu—mukhalelo w'olumwenku, mukhalelo wa siyensiya.

<sup>134</sup> Nto nwehe-tho, olelo, enamuna ahu y'osoma. Vano muheerereya okhootta ela. Kookhalana mapattuuxa a exornaale, siniixuttiha ekhapa mukere-. . . muxikola mwahu, wa anaxikola

amiravo orupihana mmosa ni mukhw'awe, wira yoone sinto anoowerya othelana mulaponi. Ayo, mulopwana.

135 Ankhi eriyari y'enamukuttho ahu? Ohiy'ula kishaakhela ekapatti ya xornaale. oLos Angeles, California, weiwo nikhuru n'anamukuttho, aPatista ni maPrespiteriyaano, arumeyi, yaaruuhaly'aya nikhuru n'amathelana yaaworu ni oxutta enamuna y'othelana yaaworu, ehimya wira yaaphavela waaruuha wa Muluku. Okathi, eyo ekhanly'aya etakhaleliwo y'okathi, eSotoma! Nto malamulo hata yaahaavara khwaatthukela.

136 Vano nri vayi hiyo? Eyeettiheryo ahu yothene ehintta emorelaka vathi vahu. Kinnoona wuncerereya w'othelana yaaworu Estadu Unidu ohincerereya ipursentu miloko miili wala miloko miraru mwaisana. Nkuupuwelani yeeyo, mulopwana onkhala ni mulopwana, siiso ntoko yiiras'aya oSotoma.

137 Wuncerereya wa ikhirime, otakhala murima w'amwaavano! Okathi xeeni onkhal'ahu? Olelo Masu ala ooprofeta aamaliheriwa.

138 Olumwenku w'etiini, ekereja eneene, ekereja, ekereja yoowiihaniwa wira ekhume, eniihanaahu ekereja yoowiihaniwa wira ekhume, okathi wookiserya wa ekereja, okathi wa ekereja ya Pentekosite, eri vayi? Eri muLawotiseya, ntoko sihimaly'aya Soolempwa.

139 Olelo awo aroorekesa iwalelo. Axithiyan'aya aniwara ekuwo nuusu n'erutthu. Axilopwan'aya t'o. . . Etthu yootepa onanara. Akina aya aathela vaara vararu wala vaxexe, munikhuruni mwa matiyaakono, ni itthu sothene sikina. Awo khathokorenrye, khukeliha opahuwa, okhala wira aakilaathi ntoko ikonselyo khukuxa opuro n'ulumwenku.

140 Nto, olelo, awo aakhalana mampa ootepa oreera, atonko aya okhalana. Nipuro nimosa, emosa aya emmuteka autitooriyu a itoolare imilyawu miloko mithanu, imilyawu miloko mithanu. aPentekosite! Yaakhalaka vanlothoni, iyaakha miloko miili ni thanu sivinre, emanaka ekoma. Khwiriwa, "Hiyo. . ."

141 Okhala wira, Yoolempwa yoohimya, mwa Wiisuupulula 3, wira mwa "'Thaaciri,' khwira, 'Miy' ka thaaciri. Kikilanthe ntoko pwiyaawene. Khiiwo enikithowa.' Nto khamunsuwela wira mootakhaliwa, oothoiwa, masikhini, oohiwar'etthu, oohoono, nto khamunsuwela!"

142 Olelo Soolempwa iya soomaliheriwa vamaithoni vanyu. Amen! Amen enihimya "ekhale siiso." Miy' nkiniihimerya amen mmansaka, masi kiniihimya wira kinnaamini wira Eyo Ekeekhaii. Olelo Soolempwa iya soomaliheriwa.

143 Ekereja ya Pentekosite eri ni mukhalelo wa Lawotiseya. Oh, awo nlelo annitupha ni okhuwela, ni wira itthu esipo yaarumaka. Esipo yamaalaru oruma, wala esipo ya molumwenkuni amosa-

amosa w'awo anrumihaaya ni wiihana oKristu, nto khula okathi enimaal'aya, ovuwa wothene woomala. Ayo.

144 Wakhalaru onvuwiha Muluku w'ekeekhai, khasiivo mituri soophiyerya—ikuru soophiyerya molumwenkuni wira omaalihe. Vakhalaru wira vekeekhai onkhuma wa Muluku, khivantthuneya esipo wira ohakalalihe. Entthuneya Eroho ya Muluku okhuruwela yeeyo. Ti yeeyo eniira.

145 Vano awo aaliyala Eyo khalayi, okhala wira aakawanya yoovaha ya Eroho Yowarya, “eyooniheryo yoopacerya y'olavula ilavulelo.” Nto miyo koowiiwa axetwani n'akhwiri olavula ilavulelo.

146 Eroho Yowarya Masu a Muluku mwa nyuwo, eniisuweliha Eneene mwaha w'okupali Masu awo. Voohikhala yeeyo, khenikhala Eroho Yowarya. Yahimyaru wira Eroho Yowarya, ni okhootha Nuulumo nimosa na Bibilia owo, khenkhala Eroho Yowarya. Eyo ti eyooniheryo sinto munnaamini wala nnari.

147 Nkawehani ethoonyeryo ekina yuulupale. aYuta ari owannyaya; elapo aya, musurukhu wawaya, aniira mpantta wa Wiiraana wa Ilapo. Awo aakhalanasa muttithi aya w'anakhotto. Awo aakhalanasa itthu sothene. Awo arisa owannyaya; yeeyo, Yesu ohimaly'awe, “Musuwele nlikanyiho na mwiri wa efiiku.” Awo arisa weiwo, aatthikela muttethe aya. Olelo Soolempwa iya soomaliheriwa, aYuta arisa owannyaya.

148 Olelo Soolempwa iya soomaliheriwa, Okathi wa Ekereja ya Lawotiseya.

149 Olelo Soolempwa iya, Matewu 24, oomaliheriwa. Olumwenku ori moopahuwani, etthu yothene; ilapo sinwana ni ilapo, itetere s'elapo mapuro manci-ene, iyuupuru suulupale sinkhuruwa, sinattikinya ilapo, ni sikina, ihasara suulupale mapuro othene. Olelo Soolempwa iya soomaliheriwa.

150 Vano ninnoona mukhalelo w'olumwenku. Ninnoona vatthu ekereja yoolikana, yoolikana...Mutthenkeso, muromolelo, ninnoona vatthu siry'aya-vo. Ninnoona vatthu ilapo siry'aya-vo. Ni ninnoona wira olelo anatiri ala aamaliheriwa.

151 Vano, masi nihiku nenla ohaana orwa, Osuulu muulupale w'Omwene w'Abrahamu. Ti yeeyo Owo onrowaaya okhala, onrowa okhala Mwaakameliwa Oomwene a Mwaana oolaiheriwa, Oomwene. Ntoko silavunly'aka nsana ohiyu, khunrowa okhala osuulu w'erutthu, onrowa okhala Osuulu wa erooho. Ohaana okhala Mwaakameliwa a erooho onrowa ovenya, yoowo onrowa okhala Osuulu w'Omwene wa Waamini wa Mwaana Oomwene a Abrahamu. Owo ohaana okhumelela mahiku ookiserya, nto okathi ni nipuro ti natiri olaiheriwaawe Yoowo.

152 Nimuttharihaka Malakhiya 4, Yoolempwa, ohaana okhumelela Mutthaka onrowa ottikinya mirima s'atthu wira

ethhikele-tho w'axitiithi arummwa. Ohaana okhala mmosa onikhumelela, ni owerya wa Eliya, onrowa okhumelela; mutthu a mothakoni onrowa okhumelela, ni onrowa okhalana Mutthaka onrowa otthikela-tho Masu. Owo p'ukathi onikhal'ahu.

<sup>153</sup> Nto, mutthokelele vano, miyo kinoovekelani okathi ula, nyuwo atthu va a oJeffersonville. 1933, Waarya woovikana soopattuxiwa waakhurunwe iwe omurathhini, nihiku nle kaapatisaaka atthu imiya thanu mwa Nsina na Yesu Kristu, mmiravo oophiyaka iyaakha miloko miili. Eyo yaahimnye-ni, Jeffersonville? Yaari exeeni Yeeyo wookiseryani w'Ephiro Spring iwe, okathi *Courier Journal*, kookupali wira aari *Louisville Herald*, yaamukumihenry'aya artiiku a Yeeyo? Okhuma vaavale khuvira Anamatthitta Oowiiwanana, mpakha oCanada. Totori Lee Vayle kukhera vaxornaaleni, ory'ene oCanada, 1933.

<sup>154</sup> Okathi waamupatisaaka mutthu aka a namuloko n'athanu n'aali, vathi va Namoono ola; nto nyuwo munnimusuwela wahala ene mukina. Vano okathi waaphwanyaney'aka weiwe, kimupatisaka mutthu a namuloko n'athanu n'aali, Waarya waahikhuruwa okhuma Wirimu, waaryaka okhuma osulu iwe, ntoko Ettheneeri emoraka okhuma Wirimu. Nsu nimosa khwira, "Ntoko Yohani Mpatisa aarummwaly'awe wira ahoolele orwa woopacerya wa Kristu, Mutthak'anyu onoohoolele Orwa Wawe wa neili, mulaponi mothene." Olelo Soolempwa iya soomaliheriwa.

<sup>155</sup> [Muthukumano onoothapa—Mol.] Olelo! [Muthukumano onoothapa vaalupale ni omuttotopela Muluku.] Muluku aahihimya. Exeeni yiiraneieye? Olelo Owo woorowa mulaponi mothene.

<sup>156</sup> Nto okathi Muluku okhurunwaawe iwe kuhimya yeeyo, kiryeene mwammiravo, vamwiiwani waavarela, ahiiso vampapani, waavarela ni Nlumi na Mooro, nno vapuwani wa Wathen Ethoka y'oUtika; kiteexaka maasi iwe, okhuma omuruttuni mpakha onapeiwa eviinyu wiiphiini, nyuwo moosuwela ekeekhai ya yeeyo. Owo khwira, "Muhikhalakhale munvuraka soona, wala owurya, wala ohonona erutthu anyu, maana wookhala muteko wira nvare mwannuwa vale." Miyo kinnikhalela onamoono wira Eyo Ekeekhaii, wira kaahoona Yeeyo. Nto Muluku, ntoko siiraly'awe ni Moise, aahilavula ohoolo wa muthukumano iwe, khwira, "Ela Ekeekhaii."

Olelo Soolempwa iya soomaliheriwa eriyari ahu.

<sup>157</sup> Nkawehani etthu Owo aahimaly'awe mwa othokorerya miyuupuwelo sa mmurimani, ni moota yaarowaaya okhala; okhuma wiixaatherya matata, mpakha osuwela isiiri sa mmurimani. Olelo Soolempwa iya soomaliheriwa vamaithoni vanyu.

<sup>158</sup> Anatiri ala yaalaiheriwe, nwehe, anatiri ala othene yaahilipiheriwa ni khumaliheriwa ni Muluku a natiri.

Nkawehani, ethomeiwe oWashington, DC, ohiy'ula, elatarato ya Nlaikha n'Apwiya!

<sup>159</sup> Okhala wira George J. Lacy, mukhulupale a iravulo sa ikatha ni ipaphelo a FBI wa kuveerunu a Estadu Unidu, aahiweha Yeeyo oHouston, Texas, khwira, “Ola ti Ookhala mmosa paahi oovikana soopattuxiwa otonko okumihiwa elatarato mulaponi mothene.” Owo ohaana osuwela; owo t'omalela osuwela okhanle mulaponi, wa yeeyo.

<sup>160</sup> Nwehe, Nlo nimphwanyaneya vale, ntoko Ekeekhai, Nlumi nenlo na Mooro naamweettinhe Isarayeli okathi ule mothakoni. Nlo ninnineettiha olelo, enamuna emosaru ya Mutthaka, ya, “Mukhume wEjitu!”...?...Olelo Soolempwa iya soomaliheriwa. Nyuwo munnisuwela Mutthaka Owo aahimaly'awe.

<sup>161</sup> Nkawehani yoowoona ya Tucson, iyaakha tthaaru sivinre, keemenleene va mphironi. Okathi, iyaakha thanu eyo ehinatthi, Owo iirale, “Nihiku epooma yaapakaly'aya ekhomo ohoolo wa mukhor'ole, murukunuwe murowe Onikela nsuwa.” Atthu aka a otapernakulu ari va, annisuwela eyo-...oka—okathi yoowo. Eyo ekeekhai.

<sup>162</sup> Ni nihiku Mwenye Goynes n'akina yaaris'aya weiwo, khuthipela ekhomo ele, miyo khwaaleela amwaar'aka, “Yookhala etthu ya yeela.”

Awo khwira, “Exeeni iyo?”

Nto miyo khurowa khuweha muliivuruni mwaka yaamukhaani. Yaari memmo.

<sup>163</sup> Nto voosiisu aya, ewoora yanamuloko, kikilanthene vaavale, okatthi waka vale, ewoora yoophiyaka ya namuloko, Nlaikha n'Apwiya khukhuruwa. Nlo khwira, “Murowe oTucson. Munrowa okhala onkela epheyo wa oTucson, nto animoorwa Malaikha mathanu na maili mwa nikhuru anrowa ottikinya elapo yothene enoorukureryani.” Ni khwira, “Munooleeliwa okhuma weiwo.”

<sup>164</sup> Akavi anuupuwela yeeyo, va, ehinatthi okhumelela? [Muthukumano oniira, “Amen.”—Mol.] Aakhala axilopwana akilanthene vaava mpaani mu ohiy'ula, yaaphwanyaneya weiwe okathi ekhumelenly'aya.

<sup>165</sup> Ni khwira, “Ikanyeryo Thanu na piili sa miiriirya soowiipithiwiwa sa Bibilia othene sinootaphuliwa, ni ommaliherya Wiisuupulula 10, wira Mmutthakani wa Nlaikha na neethanu n'eili itthu iya saahaana wiiraneya.” Olelo Soolempwa iya soomaliheriwa vamaithoni vanyu. Olelo Soolempwa iya soomaliheriwa.

<sup>166</sup> Mwaisana, neemenleene nipuro nenlo, Mwenye Wood va ni miyo, niwelaka mwaako, nixankaleene vakhani, mwaha w'amwaar'awe owereiwa. Eroho Yowarya khwira,

“Muttotte nluku vo. Murihele osulu. Nimoraka, khwira, ‘SIISO ANIHIMYA T’APWIYA, enookhala ehukhumu enrowa omana elapo ya vathi.’ Mmuleele wira onimoona ntata na Muluku, iwoora vakhani sinttharelana.”

<sup>167</sup> Miyo kimuleela Mwenye Wood; ori vaava ohi’yula. Nto, woona waka, atthu athanu n’araru wala muloko, wala muloko n’athanu, yaari weiwo okathi yoowo yiiraneiyaaya; voosiisu aya, Apwiya yaakhurunwaaya muyuupuruni khupwexa maluku vamwaako waary’ahu-vo, khuthikilasa iriitta sa miri, ni khukhala irumelo tthaaru, khwira, “Ehukhumu enrowa Olimani Onkela nsuwa.”

<sup>168</sup> Mahiku maili nuumala yeeyo, Alaska aahala opwina vathi v’elapo. Nto okhuma okathi yoowo, Olimani wothene, annikhumelela maluku a mooro a ehukhumu ya Muluku envirikanya ekuwo yeeyo ya erooho. Yookhala ekuwo ya yuuma, yookhala ekuwo ya muthala, ni yookhala ekuwo ya etampi.

<sup>169</sup> Osilimu oheetta ni nsuwa; siiso ehiira Ehapari yooreera. Sirwiiye okhuma onkhuma nsuwa khurowa onikela nsuwa, ntoko nsuwa. Nto vano Eyo eri Olimani Onkela nsuwa. Khekhanle orowaka-tho; Yarowaru, enoonthikela-tho onkhuma nsuwa.

<sup>170</sup> Profeta oohimya, “Ninoophiya nihiku nihinrowa wiihaniwa ohiyu nnakhala othana,” nihiku n’oxanka, epula yinci-ene ni etthapwe, voophiyerya paahi osuwela moota wo wiitakanxa ni ekereja wala ohela nsina nanyu muliivuruni. “Masi onookhala Waarya okathi wa makaaripi.” Olelo Soolempwa iya soomaliheriwa.

<sup>171</sup> Nsu—n-s-u-w-a nimosaru nimphattuwa onikhuma nsuwa ti n-s-u-w-a nimosaru nintupweela onkela nsuwa. Ni M-w-a-a-n-a mmosaru a Muluku aarwiiye onkhuma nsuwa khwiisooniherya Mmansawe ntoko Muluku oowiisooniherya v’erutthuni, M-w-a-a-n-a a Muluku mmosaru epantte onkela nsuwa nno, oniisooniherya Mmansawe eriyari y’ekereja ohiy’ula, mmosaru nsana, olelo, ni mahiku othene. Waarya wa makaaripi wa Mwaana ohoorwa. Olelo Soolempwa iya soomaliheriwa ohoolo wahu.

<sup>172</sup> Nri vayi hiyo okathi ula w’Abrahamu? Nri vayi hiyo okathi ula muulupale oniphwanyaney’ahu, okathi muulupale onkhal’ahu? Soowoona sothene soomaliheriwa.

<sup>173</sup> Ankhi mpatthan’ihu murumeyi va, ekereja y’onthamwene munna, Junior Jackson, aaruuly’awe wa hiyo atthyawaka ohiyu umosa, miyo kiry’ene weiwe. Khwira, “Kaahikhalana yo—yooloha, Munna Branham, enikihaaxa. Kaahiwoona axinna othene ethukumanne vasulu va mwaako.” Nto khwira, “Vasulu va mwaako va, nyuwo mwaanixuttiha iwarakha saalempwe, saakhala ntoko seiyo, iwarakha kamosa-kamosa okathi waaxoraly’aya vamwala. Vamalin’anyu yeeyo, vamanly’aya

sothene, nyuwo khunihimeerya, khwira, ‘Murwe vakhiviru,’ vano hiyo othene khuthukumana.”

<sup>174</sup> Khwira, “Nyuwo khuphwanya nipuro nimosa, yaakhala ntoko, mukwala wa yuuma khumana khuhula vasulu v’epiraamite ela yaamukhaani. Nto, vairaly’aya siiso,” khwira, “nluku na mukwili noohilempwa etthu. Vano nyuwo khunihimeerya wira ‘nkawehani vasulu va yeela.’ Nto nyuwo othene... Hiyo othene khupacerya oweha.” Khwira, “Miyu khurukunxa muru aka, khoowehani nyuwo murowaka onkela nsuwa, mwaakuvaka ntoko saawery’anyu, mpakha ontupweela nsuwa.” Akavi anuupuwela yeeyo? [Muthukumano oniira, “Amen.”—Mol.]

<sup>175</sup> Vano miyo keemenle vaavale vakhani mpakha Eroho Yowarya wuupulula. Miyo khwira, “Bibilia othene, sothene suupululeliwe mutthu, mwa okhalihiwa naxariya, oreerihiwa, opatiiso wa Eroho Yowarya, opatiiso ni Nsina na Yesu, ni itthu iya sothene, sihuupululiwa; masi sookhala isiiri siipithihiwe muhina, okhala wira Bibilia othhukiwe ni Ikanyeryo Thanu na piili. Kihaana orowa weiwe wira kasuwele.”

<sup>176</sup> Voosiis’ule okathi Malaikha ale mathuna na maili yaakhurunwaaya khurumiha elapo, nto maluku khuvavela khula ephiro, Malaikha mathanu na maili khweemela vale khwira, “Mutthikele oJeffersonville, weiwo okhumme anyuwo, maana Ikanyeryo Thanu na piili sa miiriirya mithanu na miili sinrowa otaphuliwa.”

<sup>177</sup> Hiyo nri va, olelo, nisuwelaka saana *Epyo y’Enowa*. Muhina mwa mahiku vakhani, Muluku atthuna vale, ninoosuwela saana olikana wa *Othelana Ni Omwalana*. Ni itthu iya sothene Muluku otaphunly’awe, khula Ekanyeryo, miiriirya okhuma opattuxiwakaru olumwenku. Nto hiyo ninnikhalaka mootthapani, Ohoolo wa iparakha Sawe! Eyo ekeekhaii. Olelo, Soolempwa iya!

<sup>178</sup> Erevista *Life* yaahimulaleerya artiiku a yeeyo, “Nreko nootikiniha na Waarya ninwela osulu wa Tucson ni Phoenix,” enamume emosaru koohimenry’akani eyaakha emosa ehinatthi okhumelela, moota yaarowaaya okhala, ni ntoko etriankulu. Elatarato eyo ethomeiwe mukereja iwe. Nyuwo mwaakhenle erevista eyo mookhalana. Yaari vale, voolikaneene. Awo khwira, “Erina ikilomo miloko mixexe ni tthaaru orowa osulu ni ikilomo miloko mixexe ni thanu na tthaaru etaphuwelo.” Awo khansuwela saana nlelo etthu ekhumelenle. Yaakhumelenle vootikiniha-vo ni eronwe vootikiniha-vo.

<sup>179</sup> Munna Fred Sothmann, Munna Gene Norman ni miyo, neemenle vaavo. Araru onkhala onamoona. Ntoko ale Owo aaroihaly’awe vale vasulu va mwaako; Petru, Yakopo, ni Yohani, wira ekhalele onamoona. Khweemelasa vale khuweha okathi yaakhumelenly’aya, khoona wiiriwa.



180 Nlo naari vale, niithomeiyeene osulu; voorakama, ohikhanly'aya enanelo, hata maasi wala etthu wira ekhalihe ne—neeku. Vaaweryaneya sayi awo okhala weiwe? Yaari Malaikha a Muluku yaahokolowa, nuumala Mutthaka aya. Olelo oprofeta ola woomaliheriwa eriyari ahu. Olelo Soolempwa iya soomaliheriwa.

181 Nwehe, Ikanyeryo Thanu na piili sootaphuliwa. Eyuupuru yoorowa mpakha Olimani Onkela nsuwa. Vano, muhialele, ntoko siiraly'aya ale akina wu.

182 Vano, owiriyana wahu, onooniheryaxa nihiku nahu. Soolempwa sinihimya exeeni sa olelo, ni sa okathi onkhal'ahu? Yesu alavulaka. . . Nkinrowa okhalana okathi wo waahimya othene aya, masi kintthuna kimuhimye ola mmosa nihinatthi omaliha.

183 Yesu oohimya, mwa Luka Oowaarya kapiitulu 17, versiikulu 30. Yesu Kristu, Masu Mwaneene! Munnaamini yeeyo? [Muthukumano oniira, "Amen."—Mol.] Yesu Kristu, Masu Mwaneene, oowiipaka erutthu, oolavula khuhimya ele yaarowa okhala Masu okathi wookiserya, ele yaarowa okhala ethoonyeryo y'emalelo y'olumwenku. Owo aahihimya wira elapo yaarowa owana ni elapo ekina, masi Owo khwira, "Ntoko saary'aya mahiku a oSotoma, siiso enookhala nihiku Mwaana a mutthu onrowaawe wiisooniherya."

184 Vano, okathi Yesu aarwiyaawe elapo ya vathi, Owo aarwiye mwa nsina n'Ana araru. Mwaana a mutthu, okhanle profeta; Mwaana a Muluku; ni Mwaana a Davidi.

185 Vano, Owo aakhala muumu elapo ya vathi. Owo khonahimyeke wira aari Mwaana a Muluku. Owo iirale, "Miyi ka Mwaana a mutthu." Yehova Mwaneene aamwiihanne Esekiyeli ni maprofeta, "Mwaana a mutthu." Okhala wira, Owo aarwiye omaliherya Soolempwa ntoko profeta. Moise iirale, "Apwiya Muluku anyu anoomuvenxa Profeta oolikana ni miyo." Mwaha wa yeeyo Owo ahaakhanly'awe okhalaka Mwaana a Muluku iwe, okhala wira aari Mwaana a mutthu. Owo. . . "Masu jaarweela maprofeta." Ni Owo aari Masu mwa omaliheriwa Waya. Mwaana a mutthu, pro—profeta muulupale. . . Kahi profeta muulupale, masi Muluku-Profeta, "Omalela w'eMuluku mw'erutthuni waari mwa Yoowo." Tivo, Owo aari Mwaana a mutthu.

186 Vano, mwa iyaakha ikonto piili, hiyo nimmusuwela Owo ntoko Mwaana a Muluku, Eroho.

187 Vano oMileniyu, Owo onrowa okhala Mwaana a Davidi, vasulu v'Ehice. Hiyo othene ninnisuwela eyo, ninaamini Soolempwa.

188 Vano, Yesu oohimya, wira woomalelani w'okathi yoola wa ekereja onkhal'ahu, wira, "Mwaana a mutthu aamurowa

wiisooniherya-tho enamuna emosaru yaary'aya, ntoko saary'aya oSotoma."

<sup>189</sup> Nwehe vano, mwa omutthariha wahala, ntoko Owo sihimaly'awe. Owo ohimnye wira, "Ntoko saary'aya mahiku," yoopacerya, "a Nowe, moota awo yaaly'aya, owurya, othelana, otheliha." Vano Owo khumooniherya, voottharana, vookiserya, Mwaana a mutthu, oSotoma. Okhala wira, Owo eettana aYuta; nno, oSotoma, Owo oneettana Amalapo. Iwe, Owo aahaapwiniha othene ni maasi, muhukhumuni; nno, w'Amalapo, Owo aahaapaha othene nihiku n'oSotoma. Ti yeeyo. Olumwenku w'Amalapo waahipaheya iwe, "nto siiso enookhala okathi Mwaana a mutthu oniisoonihery'awe." Kahiyo-tho maasi, masi onrowa okhala mooro ekwah'ela. Yesu aamusomme Mwaphattuwelo 23 yoowo hiyo nimmusom'ahu, okathi aasomaly'awe sa oSotoma.

<sup>190</sup> Vano, hiyo ninnikupali mikhalelo sihimmwe, wa mukhalelo w'olumwenku w'oSotoma, aSotoma, mukhalelo w'oSotoma. Hiyo, khula mmosa, ninimwiirela "amen" yeeyo. Hiyo ninnaamini yeeyo. Vaareera.

<sup>191</sup> Nto mukhalelo wa erooho wa Lawotiseya, ekereja y'erutthu, hiyo ninimwiirela "amen" yeeyo, ni okupali ithoonyeryo saya. Hiyo noosuwela wira ithoonyeryo sothene sookhala. Ekereja eri muLawotiseya. Hiyo noosuwela eyo. [Muthukumano oniira, "Amen."—Mol.]

<sup>192</sup> Noosuwela wira olumwenku ori mukhalelo w'oSotoma. Ti yeeyo? [Muthukumano oniira, "Amen."—Mol.] Ninookupali iyo.

<sup>193</sup> Masi ankhi ethoonyeryo y'Abrahamu, ole aamulipelela mwaana oolaiheriwa? Owo aari mukina.

<sup>194</sup> Muupuwele, awo jaarina Sotoma iwe; yaahikhalana namitthak'aya. Ni Abrahamu aahikhalana Namitthaka aamurweenle.

<sup>195</sup> Abrahamu aanilipelela, nihiku ti nihiku, wira, yiiranye ethu ntoko yoohiweryaneya. "Sara, iyaakha miloko mithanu na mixexe, owo emiya." Voomutthariha natiri a Muluku, owo nlelo aamulipelela. Eriyari ya wuulumeliwa wothene, owo aanimulipelela mwaan'owo.

<sup>196</sup> Siiso t'okhanly'awe mulipa-oowaamini eekeekhai nlelo onnilipelela othika wa Mwaan'owo oolaiheriwa! Nwehe, okathi vakhani mwaana ahinatthi orwa, yaahikhalana ethoonyeryo aavahiwaawe. Osuulu w'omwene w'Abrahamu khunrowa wuupululeliwa ethhonyeryo ya Mwaana onoorwa ommulipelela Mwaana Oomwene, siiso saary'aya wa tiithi aya Abrahamu wa mwaana eerutthu? [Muthukumano oniira, "Amen."—Mol.] Eyo ekeekhai? ["Amen."] Yesu ohimnye siiso, va mwa Luka Oowaarya 17:30, "Okathi ula ohinatthi orwa, wira, Mwaana a mutthu aarowa wiisooniherya ntoko Owo siiraly'awe mahiku a

oSotoma, ohinatthi opwexakasiwa Sotoma.” Vano ninwehererya ethoonyeryo.

<sup>197</sup> Vano nrowe niwehe mikhalelo sa okathi ntoko saary’aya oSotoma. Nwehe, othene aya yaamalenle eSotoma, olumwenku.

<sup>198</sup> Kinoona wira tiretooro mmosa a isineema aahikumiherya efiilime, woohikhala khalayi, ni kaahipherya woona, yihaniwa, *Sotoma*. Mwakhalakhalaru moonaka nto khiivo etthu ekina woohikhala yeeyo, moone. Vekeekhai ethoonyeryo yooreerela Estadu Unidu olelo, Hollywood, voolikana; muthinto mmosaru wa ikuwo ni itthu sothene sikina awo yiiras’aya okathi ule; ni maira aya maalupale oohapaliwa ni itthu sothene sikina, atthu ootthara etiini, anihaniwa anatiini.

<sup>199</sup> Nwehe, nto Sotoma aahikhalana namoona mmosa, aari mulopwana mmosa iihaniwa Lothi, aari paahi musulu a—a Abrahamu.

<sup>200</sup> Vano, Abrahamu khaaronwe oSotoma, owo nnikhuru nawe. Owo aahikhalana nikhuru nuulupale, noophiyerya owanana mamwene oophiyaka etuusiya ntero ni anakhotto aya. Vano, owo aahikhalana nikhuru nuulupale. Nto owo aakilanthe vale vathi va mwiri karvaalyo, nihiku nimosa, okathi itthu sothene sahaary’aya saana wa yoowo; khaavo aacaliwa n’uwo, masi nlelo aanimuvarelela natiri uwo.

Nwehe vano, oratteene, nihinatthi omaliha.

<sup>201</sup> Owo akilantheene vale, yaahirwa axilopwana araru, emwaattamelaka. Aili aya yaaronwe oSotoma khwaalaleerya Ehapari yooreera, wira ekhume, Lothi. Eyo ekeekhai? [Muthukumano oniira, “Amen.”—Mol.] Masi Mmosa aahanle ni Abrahamu. Nwehe, Mmosa ole aahanle n’Abrahamu aari Muluku Mwaneene. Aili aya akina yaari Malaikha anamitthaka.

<sup>202</sup> Vano, oSotoma, awo khayaapakale hata mwiiirya, yaakhalinhe ohoona paahi. Nto olaleya Ehapari yooreera ennaakhaliha kweekwe ohoona.

<sup>203</sup> Vano nkawehani saana yookhumelela ya nihiku nle. Yookhala ekereja y’erutthu. Okathi wothene mwa ttharu, ntoko sihimaly’aka nsana ohiyu, ntoko Muluku sinooniheriwaawe. Yaahikhala aSotoma; a nihimo na Lothi; ni a Abrahamu. Mukhalelo mmosaru ohiy’ula, olumwenku ori siiso.

<sup>204</sup> Mukihiye kookoheni etthu emosa. Nkawehani yookhumelela ela vano. Abrahamu aamwiihanne Mulopwan’ola aalavula ni yoowo, “Elohim.” Nuulumo n’Eheperi *Elohim* nnihimya “Ole oomalela mwa sothene, Ole okhanle Oohimala,” Elohim, Muluku Mwaneene!

<sup>205</sup> Wopaceryani, Maphattuwelo 1, ahimye wira, “Wopaceryani Muluku...” Mukuxe nuulumo n’Eheperi vo, ahiiso, nuulumo n’Ekereku, kiireke, “Wopaceryani *Elohim* oopattuxa erimu n’ilapo ya vathi.”

206 Va, Owo, mwa Maphattuwelo, 22 va, Owo onnihimya-tho, ahiiso—ahiiso 20, Owo iirale, nto iihanne nsina na Mulopwan'ola "Elohim." Iirenle-ni yeeyo? Muluku, owooniheriwa v'erutthuni ya mutthu, aakilanthe n'Abrahamu khukhuura esante y'enama ya mwaanyompe, khuwurya eleethi, khukhuura mukatthe. Muluku Mwaneene, khulakaseya ohoolo w'Abrahamu.

207 Masi Owo aahinvaha ethoonyeryo. Nwehe. Nto ethoonyeryo eyo yaari wii Owo aarukunuxenle ettuli awe eheema.

208 Nto muupuwele, Abrahamu, nsina nawe naari *Abramu* mahiku vakhani eyo ehinatthi, ni Sara aari *Sarai* ehinatthi yeeyo; S-a-r-a-i vano S-a-r-a, ni A-b-r-a-m-u khukhala A-b-r-a-h-a-m-u. *Abrahamu* enihimya "tiithi a maloko."

209 Vano nwehe oratteene va, nto ninimoona yookhumelela ela y'okathi onkhal'ahu vano, ntoko sinihimeeraly'awe Yesu wira niweheke yookhumelela yeela. Nihoona wira sothene sikina ti soolikana; vano nrowe noone Osuulu w'omwene, yookhumelela xeeni orinaaya woona.

210 Vano Mulopwan'ola iirale, "Abrahamu, amwaar'inyu ari vayi, Sara?"

Nto Abrahamu khwira, "Ari muheemani, ottuli Wanyu."

211 Vano, Owo khaatonko omoona. Owo aasuwenle sayi wira nsina nawe aari *Abrahamu*? Owo aasuwenle sayi wira nsina nawe aari *S-a-r-a*? "Abrahamu, amwaar'inyu ari vayi, Sara?"

Khwira, "Awo ari muheemani, ottuli Wanyu."

212 Owo khwira, "Miyo..." "Miyo," nuulumo n'omuromola mutthu. "Miyo kinoorowa woothotolani kimuttharihaka natiri. Amwaar'inyu anoorowa okhalana mwaana. Nyuwo mookiroromela, vano kinrowa okhumeleliha."

213 Nto Sara, muheemani, ottuli, aiwaka mwa siiri ahiiso aiwaka voowiipitha, khula enamuna muniihan'anyu, aiwelelaka muheemani, owo aahitheya muhina-muhina, nto owo khwira, "Vano, miyo, muthiyana oowuuluvala ntoko siry'aka, kinoosiveliwa n'apwiy'aka; n'awo yuuluvanleene, nave, vale a iyaakha emiya? Okathi, ela ehiraneiy'aya iyaakha, iyaakha sinci-ene."

214 Nto Mulopwana, M-u-l-o-p-w-a-n-a, aakilanthe vaavo aly'aka, mw'erutthuni ya mutthu, awuryaka ni aly'aka ntoko mutthu ene pure; ni ntthupi mukuwoni mw'Awe, ni aahikhalana ntthupi munawoni mw'Awe, vano Abrahamu khurapiha. Muluku, Mwaneene, khuwehaweha, nto Owo khwira, "Sara otheyenle-ni, ottuli muheemani, ahimiyaka *yeela*?" Owo aahisuwela, aaniwerya othokorerya soowuupuwela sa Sara muheemani, ottuli Wawe. Eyo ekeekhahi? [Muthukumano oniira, "Amen."—Mol.]

215 Vano, okathi Osuulu w'Omwene w'Abrahamu orwiiyaaya mulaponi, ethoonyeryo xeeni Owo ooniheny'awe, Mwaana a

muthu. Simoni aahirwa wa Yoowo nihiku nimosā; Antere aahimuruuha. Owo khwira, “Nsina nanyu mwa Simoni. Nyuwo mwa mwaana a Yona,” Owo khwira. Moone, eyo yaahimukhaliha mulipa-oowaamini.

216 Filipe aahirowa khimukuxa Natanayeli; khutthika, khwira, “Murwe, mmoone Mulopwana mmosa Yoowo nimu—nimuphwanny’ahu; Yesu a oNasareti, mwaana a Yosefe.”

217 Owo khwira, “Vano mulipelele minuutu mmosa. Wookhala ookhumaka-wo etthu yooreera moothipelelani mme?”

Owo khwira, “Murwe, moone.”

218 Vano Filipe varwiiy’awe Ohoolo wa Yesu, ni Natanayeli, Yesu aahimuweha khwira, “Owo vo mwIsarayeli mwa yoowo khuuvo-vo wootha.”

Owo khwira, “Rabbi, mukisuwenle liini?”

219 Khwira, “Filipe ahinatthi owiihanani, mury’ene vathi va mwiri, Miyo kaahiwoonani.”

220 Owo khwira, “Rabbi, Nyuwo mwa Mwaana a Muluku. Nyuwo mwa Mwene a Isarayeli!”

221 Okathi mwaamuthiyana veehimeni, mwa mukhalelo awe woohureya, vaphiyaly’awe, elataro yaamukhaani etthu ntoko ela, wira arike maasi. Yesu aarumme awiixutti, othuma solya. Owo varwiiy’awe orika maasi, Owo khwira, “Mukiruuhele maasi, muthiyana.”

222 Owo khwira, “Khanilimalenle Nyuwo ohimya yeeyo. Hiyo nookhalana ovalaana nno. Vano, nyuwo aYuta khamurina naata ni hiyo aSamariya; hiyo khanirina naata ni nyuwo.”

223 Owo khwira, “Masi, muthiyana, mwaamusuwenle Ole onlavulan’anyu, mwaamukivekela Miyo maasi. Miyo kaamoovahani maasi mwahaarow’anyu orwa va orika.”

224 Owo aahittemulela mukhalelo awe, yaari exeenii. Owo khwira, “Murowe mwaakuxe aiy’anyu murwaase va.”

Owo khwira, “Miyo nkirina iy’aka.”

225 Owo khwira, “Moohimya ekeekhai. Mwaahikhalana athanu, nto ole munkhalan’anyu vano kahiyo awinyu.”

226 Owo khwira, “Napwiya, kinoona wira Nyuwo mwa profeta. Hiyo noosuwela wira Mesiya arwa vale Owo onoonooniherya itthu iya.”

Yesu kwira, “Miyo ka Yoowo.”

227 Mwa yeeyo, owo aahitthyawa arowaka mmuttettheni khwira, “Murwe, mmoone Mulopwana mmosa Yoowo okihimenrye itthu kiiraly’aka. Kahiyo Yoola Mesiya ene?”

228 Nwehe, Owo iirale eyo ohoolo w’Ayuta, ni aSamariya, masi khaatonko wira w’Amalapo. Amalapo, hiyo atthu, naari apakawu mahiku ale, ilapo sikina, nikuxaka ekopo ottuli wahu,

naakokhorelaka amuluku eethiru. Hiyo khanaamulipelela hata Mesiya.

229 Owo onaakhumelela ale animulipelela, ni nihaana omulipelala Yoowo.

230 Masi ale yaahimya wira yaanimulipelela, ekereja eneene, voonaly'aya eyo wiiriwa, awo yiirale, "Owo xetwanii. Owo nahako, Pelizepuli!"

231 Nto Yesu khwira, "Etampi iyo yaamuleveleliwa," okhala wira Owo iira ahinakhwe nlelo. "Masi," khwira, "nihiku nimosa Eroho Yowarya enimoorwa nto wira etthu emosaru, olavula nuulumo nimosa nooveeha Yeeyo khenkhalakhala eleveleliwaka." Nlo ti nihiku nla, vaavo Masu othene arin'aya olikana vamosa. "Olavula nuulumo nimosa nooveeha Yeeyo; khenkhalakhala eleveleliwaka olumwenku ula nnakhala olumwenku onrwa."

232 Ole waari Osuulu w'Omwene w'Abrahamu. Nto va Osuulu yoowo w'Omwene w'Abrahamu, waarwiye mwaha wo wiisuwanyeiha iwe wa Mulopwan'ole aakilanthé vale n'Abrahamu, ohoorwa wooniherya wira aari Muluku mmosaru yoowo, alaiheryaka nihiku nla, "Ntoko saary'aya mahiku a oSotoma, siiso enookhala orwa wa Mwaana a mutthu, okathi Owo oniisoonihery'awe Mwaneene ntoko Mwaana a mutthu." Amen. Nla ti nihiku wira Soolempwa iya simaliheriwe.

233 Nkawehani yookhumelela erin'ahu olelo. Nkawehani ekereja vaavo Mwaana a Muluku...Nkawehani nihiku n'oxankiha. Nkawehani soolaleeriwa s'eprofeta sothene. Vano, etthu yootikiniha, aletto ahu ahanle ophiya nto, vakhala wira yookhumelela ehaana okhala ntoko oSotoma.

234 Yaahikhala araru jaarwiye, axilopwana araru oohilimaleleya yaarummwe okhuma Wirimu. Hiyo ninookupali iyo. Araru aya; Mmosa aahanle n'Abrahamu. Othene aya yaapacenrye weive, masi Mmosa aahanle n'Abrahamu. Akina aya yaarowanse oSotoma. Eyo ekeekhai? [Muthukumano oniira, "Amen."—Mol.] Nto Abrahamu aahirukunxiwa nsina, wa Abramam khukhala Abrahamu. Ekeekhai? ["Amen."]

235 Khiivo hata emaara emosa mwa wahala, ekereja ya mulaponi, etonko aya okhalana namalaleya, a nsina nimmalela ni h-a-m, mpakha olelo, Billy G-r-a-h-a-m. Eyo ekeekhai? [Muthukumano oniira, "Amen."—Mol.] G-r-a-h-a-m, ileetera thanu na mosa. A-b-r-a-h-a-m-u ileetera thanu na piili. Masi G-r-a-h-a-m ileetera thanu na mosa, okhanle olumwenku, mutthu. Munnona?

236 Nkawehani exeeni yaaronwe iwe, olelo, t'anamitthaka ale ookhuma Wirimu.

237 Ookhala mutthu elapo ya vathi onlaleerya orukunxa murima voowiiweya saana ntoko Billy Graham? Ootoko okhala mutthu

otonko ophwanyiha etthu v'atthuni, ntoko Billy Graham? Khonakhaleke, mulaponi mothene, mutthu mmosa. Oh, Billy Sunday, n'akina, yaari weno Estadu Unidu, masi Billy Graham onsuweliwa mulaponi mothene. Munnoona oniihanel'awe-wo? Okhuma-wo oSotoma.

238 Ni owo ookhalana nikhuru nawe nimmuhoola iwe ni ekereja ya Pentekosite, Oral Roberts.

239 Masi ankhi nikhuru Noothanliwa? Ethoonnyero xeeni entthuneya awo woona? Exeeni entthuneya awo okhalana? Aleluya! "Onookhala Waarya okathi wa makaaripi." Olelo Soolempwa iya soomaliheriwa. [Muthukumano onoohakalala—Mol.] Olelo natiri a Muluku oomaliheriwa. Hiyo noosuwela wira eyo Ekeekhaii. Owo ori vaava ohiy'ula ntoko saary'awe okathi ule.

240 Vano, olaleya, ehimaly'aka okathi vakhani ovinre, mwalaleya etthu p'itthu ekhanle Ekeekhai ya Ehapari yooreera, vano Muluku ohaana olipiherya yeeyo. Eyo ekeekhaii? [Muthukumano oniira, "Amen."—Mol.] Vano, vaari siiso, Muluku olempe Masu, Muluku olaleenrye s'eprofeta, Muluku okhanle Muluku a Masu, arwe ooniherye wira Owo nlelo Mulukuu.

241 Ntoko Eliya aawenly'awe vamwaako; awehaka, Elisewu aaronwe omuweha Eliya, owo khwira, "Kintthuna ipantte piili." Vano mukhumi waari mw'Eliya khummorela Elisewu. Owo khukhuruwa, khukhuna mukhumi uwo khumana mmuro, khwira, "Ori vayi Muluku a Eliya?" Nto etthu emosaru yaamukhumelenle Eliya yaahimukhumelela Elisewu.

242 Ni Ehapari yooreera emosaru, Owerya omosaru, Mwaana a mutthu mmosaru aakhanle nsana, ookhala olelo, ni onookhala voohimala. aHeperi 13:8. Munnaamini Yeeyo? [Muthukumano oniira, "Amen."—Mol.] Vano, kinookohani nyuwo. Nkikhanle okhalaka Yoowo, masi Owo ori vaava. ["Amen."] Hiyo n'anamakuxa paahi.

243 Amosa-amosa a nyuwo atthu iwo, munwereiwa ni muri ooriipiwa murima, munsuwela wira miyo nkinoosuwelani, mmuhiye Muluku vano. . . kawerya-ru wiiveyiha voophiyerya. Nyuwo mulompe ni munvekele Muluku.

244 Miyo nkinoona wira. . . Khiivo ettikitti ya mavekelo mpaani mu, yookhala? Nnari, miyo nki. . . Khanikanwe hata ittikitti sa mavekelo. Ninrowa okhalana muthukumano wa mavekelo. . . ahiiso ovonihwiwa w'aretta, mukereja. Masi, nyuwo nvekeleke.

245 Ni nyuwo moosuwela wira ka mmalapo voomalela wa nyuwo. Moone, nyuwo munnikisuwela, a oJeffersonville! Nkintthuna wira atthu a oJeffersonville yiire. Kinaatthuna atthu oohikhala a vaava nipuro nlo. Noone sinto Muluku nlelo onnuupulula! Noone sinto Owo nlelo mmosaru nsana, olelo, ni mahiku othene!

246 Mwiire ntoko mwaamuthiyani'ole siiraly'awe. Owo aaroovira vale, khwira, "Kinnimwaamini Mulopwan'ola." Owo aavuuva ephome, nto khwira, "Kawerya-ru okwannya mayaya a nlaya Nawe, kinnaamini wira kinookhala mukumi." Eyo ekeekhai?

247 Mwaha wo waamini wawe, nihiku nle, Soolempwa saahimaliheriwa. "Owo aahaalipiha murima ale ooriipiwa murima, waavoniha aretta ni ale oorakala."

248 Okathi muthiyani'ole okwaannyaly'awe nlaya Nawe, khurowa khukilaathi, Owo aahirukunuwa khwira, "T'ani okikwanyale?" Owo aasuwenle sayi, eriyari y'atthu ale oowaattexa, alakela vaara miloko miraru w'ale ari va ohiy'ula, ikonto sene a yaawo? Owo aasuwenle sayi? Owo iirale, "T'ani okikwanyale?" Owo khaahimnye mahala-ene tu; Owo aahimenrye okhala wira yaari ekeekhai. Nto Owo khwira, "T'ani okikwanyale?" Nto naanaanoru Owo khuwehaweha khumoono mwaamuthiyana, nipuro naakilanth'awe ahiiso neemenly'awe, khula enamuna aary'awe, khimuleela wira ovuuva wawe ephome waahimala.

249 Owo aari Yesu nsana. Ti Yoowo olelo. Munnaamini yeeyo? [Muthukumano oniira, "Amen."—Mol.]

250 Miyo nkinoosuwelani; Muluku onnoosuwelani. Masi munniwereiwa mpararani mwanyu, onoohaaxani-mo. Ti yeeyo. Nyuwo mukilantho vo nvekelaka mwaha wa yeeyo. Miyo ka mmalapo wa nyuwo, ni n'amalapo mmosa ni mukhw'awe? Nvenye, yakhala yeeyo. Miyo nkinoosuwelani. Ti mulopwana *ola* va vanlothoni, mwammirav'ola. Nave-tho murina mmilo woohiloka. Ti yeeyo. Munoovekela mwaha yeeyo. Nyuwo murimuukhuwa othene mwaha w'etthu. Munrowa okhuma vamuthukumanoni va okhala wira, mwa murumeyi, mookhalana ivarihanelo kamosa-kamosa murinaanyu okhapelela. Eyo ekeekhai. Uh-huh. Munnaamini wira Muluku onnisuwela nyuwo mw'ani? Reverendu Mwenye Smith, vano muroweke nvonihwe. Yesu Kristu ohoovonihani. Rowakani vamuthukumanoni vanyu; mmilo anyu khunrowa woohaaxani.

Owo onkwaanyale pani?

251 Ookhala mulopwana mmosa okilantho ottuli *nno*; owo onoohaawa. Owo orina nipotthe vansasuni vawe epantte ya moonoo woohiyana. Owo khani... Owo kahi a wenna. Nyuwo mwa namuteko a mmukotini. Eyo ekeekhai. Miyo ka mmalapo voomalela wa nyuwo. Yakhala ekeekhai, muttikinye ntata. Nipotthe nlo niri vansasuni vanyu epantte ya moonoo woolopwana, ni mootthokiheriwa wooperariwa naanaanoru. Eyo keekhai? Nyuwo khamuhiyo a wenna. Nyuwo munikhuma ota wa muttetthe. Nyuwo mwa a oVirginia. Ti yeeyo. Munnaamini wira Muluku onnisuwela nyuwo mw'ani? Mwenye Mitchell, ti yeeyo, muroweke owaani mukhale mukumi. Yesu



Kristu onnookhalihani mukumi. Mmukohe mulopwan'owo! Nkinatoko omoona, kookhalaru. Owo aakilanthe vale, avekelaka.

Olelo Soolempwa iya!

<sup>252</sup> [Munna Branham onrukunuwela ettuli muthukumano—Mol.] Va ori muhano mmosa okilanthe ottuli nno, ottuli waka, ntoko Sara aary'awe muheemani. Owo oninvekelela mwan'awe mwaamuthiyana. Nvenye. Mwanaw'owo khokhanle vaava; ori ottaiwene, mwaana muthiyana. Nto nyuwo muri ntoko muthiyana aarwiiyaawe wa Yesu, aarina muthiyana mmosa aahaaxiwa ni xetwani voowoopiha. Muthiyana ene ori. . . mwaaruusi ovarawe xetwani. Owo khokhanle vaava. Owo t'a. . . Nyuwo munikhuma oCarolina du Norte. Munnaamini yeeyo? Nto eyo ekeekhaii, kehiyo? Muhano Orders, muroweke owaani. Mwaaminiru ni murima wothene, munoomuphwanya mwan'inyu ntoko saaphwanyawaawe ole okathi Yesu Kristu mahiku avinre, aahimyy'awe wira aahivonihiwa.

<sup>253</sup> Olelo Soolempwa iya; ethoonyeryo ya oSotoma, ethoonyeryo ya Osuulu wuulupale, ethoonyeryo ya ekereja y'erutthu! Olelo Soolempwa iya soomaliheriwa eriyari anyu. Munaamini yeeyo? [Muthukumano oniira, "Amen."—Mol.]

<sup>254</sup> Munnitthuna omukupali Yoowo naanaano va ntoko Moopoli anyu ni mpenuxa? Nvenye mweemele, khula mmosa a nyuwo, mwiire, "Kinnaakhela openuwa waka. Kinnimukupali Owo okhala Moopoli aka. Kinnimukupali Owo okhala Mwene aka." Khula mmosa avenye eemele.

Olelo! Nwiriyaane, apatthani.

<sup>255</sup> "Owo aahisoma Soolempwa, khimunnyererya Bibilia namukuttho, nto," khwira, "maitho othene a atthu yaamuwehexexa Yoowo. Vano Owo khwaaweha, khwira, 'Olelo Soolempwa iya soomaliheriwa.'"

<sup>256</sup> Miyo koosoma Soolempwa, ni iyooniheryo etuusiya ntero wala soovikana wira hiyo ninkhala mahiku ookiserya, nloko ninrowa omoona Yesu Kristu athikelaka elapo ya vathi. Nto kinooleelani nyuwo ohiy'ula, tho, olelo Soolempwa iya soomaliheriwa vamaithoni vanyu.

<sup>257</sup> Nyuwo oTucson, nyuwo oCalifornia, nyuwo oNova Yorke, olitariwa w'atelefooni ala, olelo Soolempwa iya soomaliheriwa vamaithoni vanyu.

<sup>258</sup> Nrowe nitteeliwe murima ni nitthapeke, maana niira n'Othela na Mwaapwittipwitthi nri vakhiviru, ni Mwaakameliwa Awe. . . Mwaakameliwa Awe ohiilikanyiha.

<sup>259</sup> Nrowe nivenxe matata ninvuwihe Yoowo, nyuwo atthu othene. Muluku ooreeriheni. [Muthukumano onoothikela ohakalalaka ni omuttotopelaka Muluku—Mol.]



*OLELO SOOLEMPWA IYA SOOMALIHERIWA* EMK65-0219

(This Day This Scripture Is Fulfilled)

Mutthak'ola wa Munna William Marrion Branham, opaceryawene olaleeriwe ni Enkelesi Namathanu ohiyu, mahiku yeetaka 19 mweeri wa Feveiro, 1965, Exikola Sekuntaariya y'Amiravo Parkview oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)